

三吳醫案 卷壹貳

目列篇以

赤水玄珠全集





諸縉紳名家贈文

贈太醫東宿孫君序

蓋士君子有濟世之心者必託經世之術以運之遇不遇無論也何也得時而駕則宇內之休戚利害隱然共之視其患若切於身之疾痛疴癢不措之安全不止此士君子之心得位以行之者也不幸不獲遇澤不及物而心不得施有志君子往往懷其道而隱於醫故是昔人謂濟人利物無位者不能惟醫以救死扶生爲功故業之者可以推不忍之心及於物而於道有益有味乎其言之也然醫豈易言哉吾聞其宗旨自內經本草以來書之藏於有司者一百七十九家非博通鉅儒超悟上哲顛攻其業何能探討洞明其陰陽寒熱靜燥虛實消息盈縮之奧而措之行事夫人之待命於醫生死攸係迺以未諳淺薄者嘗試之其不賊人之命者幾希醫以濟人至於賊人可不畏耶此醫之所以難言也余頃多病謁告山居嘗嘆濟物之衷未措於用顧思延醫以求濟其身然而醫之良者苦不一遇也迺壬申秋仲吳君柳溪譚新安海陽有孫君東宿者醫可謂稱良矣余亟請而相印證之耳其論瀕瀕乎素難之旨而表裏夫張劉孫李丹溪伯仁諸家其視余疾也未投藥先譚余之經絡色脉機能與受病之自即勿藥而余病爽然若失及詳察其端方之度沉著之思淵淵之圃奧則杳焉莫竟其涯非所謂深於道而隱於醫者耶余因詰之曰神農嘗百草先天而命之藥黃帝岐伯後天而著之經此天以神授聖以神符不可及矣嗣後若和扁華佗淳于意仲景思邈河間東垣朱滑莫

不鑿弄化機制人命於掌上術亦神也何今之事是業者不能踵其芳躅耶抑世代之不同也孫君勃然曰古今人非不相及用心殊爾宋儒有言古之仕者爲人今之仕者爲己不佞亦謂古之醫者爲人今之醫者爲己道不同而受病一也夫士君子之視天下與吾身血脉相流通天下病若痼瘵之切身天下安則愜然而無恨雖以道爲藥石者其濟宋以醫爲道術者其濟狹其心一也故古之醫也以救死扶生爲心其業專而用方也慎專則精而造詣入室慎則審而投藥奏功此和扁諸名家所以悉臻秘妙稱神奇今之醫則異是也將以市利非以濟人黃岐以來諸書非不剽竊以資口說迺其心則實胡越一膜視天下率以利之盈誦爲心之重輕人之濟與否若與吾術不相關此何以比古人而接其芳躅哉不佞奎何能造古賢哲之闡奧第無愧於此心爾余聞而喟然嘆曰孫君充是心而行是術其將大有裨於時矣雖隱而亦顯也因次其語而歸之爰以訂夫業是術者是爲序

萬曆癸酉中秋日吳江孫質庵從龍敬書於符丸草堂



醫案三吳治驗一卷目錄

萬歷龍飛二年吳小峰小川目疾

張孝廉後渠大頭疫三

鄭都諫公子痘有發明五

大宗伯董潯陽翁脾胃疾有發明七

馬厨瘧痢併發有發明九

大光祿龐太夫人寒熱頭痛飽悶十一

張思軒夫人心痺有發明十三

潘大司馬腸風十五

舜田臧公氣虛中滿十七

潘見所公半身不遂有發明十九

凌夫人孕二十一

沈別駕夫人產後發熱有發明廿三

吳北海令政經行四肢壘又發塊紅紫廿五

竹匠婦妊娠吐血胸腹脹痛有發明廿七

金妓時疫二十九

李雙痛風三十一

蔡中林內人陽明少陽合病三十三

萬歷甲戌沈中丞案二

吳江孫行人痛風有發明四

張文學子心病虛弱有發明六

董龍山夫人便血八

吳肖峰令政腹痛有發明十

光祿公痰火脇痛有發明十二

馬迪庵公內傷腹脹大小便不利有發明十四

馬鳳林內子隱疾有發明十六

金谿令君臧老夫人頭疫有發明十八

見所公白濁有發明二十

金元岩令眷產後痢二十二

吳太夫人白帶二十四

周芻王白濁二十六

李妓夢遺咳嗽二十八

曹鏗胸膈不暢三十

沈別駕門下老僕三陽合病有發明三十二

吳九宜先生早晨泄瀉三十四

沈大官左膝腫痛不能起止三十五

沈繼庵下痢脫肛 內人乾霍亂卅五

沈晴岳先生五更耳鳴三十六

潘景宇內人頭痛作瀉三十七

臧六老上吐血下瀉血三十八

臧氏婦臍邊痛下痢紅白三十九

丁耀川令堂吐血左膀肛門互換作痛四十

丁文學令姊暈厥四十一

金良美咳嗽吐紅潮熱右脇不能臥四十二

倪五娘子口眼歪邪四十三

王祖泉令政頭痛惡寒汗出如雨四十四

溫異橋子婦帶下四十五

溫一渠內人血虛咳嗽四十六

溫巽橋二令媳產後右脇脹痛白帶如膿四十七

溫天衢病目吐血四十八

張二娘子孕七月嘔吐不止四十九

王敬泉內眷痰嗽腹脹五十

溫南溪內人大便秘結五十一

陳春野公令愛丁奚疔症五十二

潘敬齋令媳血下筋膜如手大者一二桶五十三

張懷赤公早晨洩瀉下元虛寒五十四

臧七房二老夫人痢五十五

蔡樂川令眷頭痛如破五十六

周蘆汀迺眷胃脘痛五十七

門人余煌

三吳治驗

子朋泰來全閱梓

萬歷龍飛二年小春月予始遊苕之東雙林於時族兄吉泉之友吳小峯與其弟小川俱病日專科者愈治愈重其自始紅腫次加大太陽痛繼則白星翳疊出予不以目科名而識者予稱大方因謀於吉泉曰醫以通變為良昔秦越人過邯鄲聞貴婦人則為帶下醫過縱陽聞周人愛老人則為耳自痺醫聞東宿君國手也必能隨俗為變願一言去吾兄弟目疾吉泉邀予余曰嘉靖間論醫者必首西吳如周仲仁氏凌漢章氏王賓湖氏者皆擅一時名其家世必有傳也何需於予吉泉曰渠家慕弟久矣且其尊人受博士易為西吳名家弟好易幸一往藉此為談易地毋遜疹其脉小峯之脉濡而緩大兩目血縷直貫瞳人薄暮則疼小川之脉皆洪大鼓指黑珠有浮翳癢隱澁難開大小便皆不利故於小峯用補先以清肝散與之夏枯草五錢香附四錢甘草一錢五分細茶五分以徹其痛藥兩進而痛止繼用人參白茯苓熟地黃枸杞子桂心牛膝破故紙白蒺藜牡丹皮服八日而愈於小川用瀉內用瀉肝湯及當歸龍會丸外用象牙冰片為末點之七日全愈其尊君我峯翁喜詣予曰二日均病年同齒染同時諸醫同治而同不愈先生一補一瀉而二病均愈何哉余曰此陰陽虛實之辨也經云實者正治虛者從治令姪之症惟厥陰肝火熾盛肝嘗有餘有餘者瀉之正治也耶君下虛又為怒所激怒則



火起於肝肝為藏血之地故血絲貫瞳人而薄暮作痛方用夏枯草香附為君疏其肝氣經云肝苦急急食甘以緩之故用甘草為臣茶能清頭目用以為使先為去此痛經又云水流濕火就燥故復用甘溫補其下元之虛俾火得歸原此從治也若用苦寒降火之劑不惟血凝而痛加抑且激其火而使愈熾矣我峯聞之語人曰孫君本陰陽而治寒熱是用易為醫也故補者補効攻者攻効語曰不知易者不可以為太醫孫君神於易而於醫乎何有願於吾茗懸一壺也余晒之謂昔韓伯休且不欲人間知其名余又何壺之可懸哉一

萬歷甲戌其年自仲秋徂冬瘖子盛行三月內予所治男婦嬰孩共七十二人茗之望族沈最著大中丞觀頤公當考功時幼君瘖喘嗽不寧聲啞發熱洩瀉斑紫不歛予以小無比散愈之夫人妊腹痛昏厥者五日名醫如高陳二公者沈姻婭無巨細悉任之亦不能措手予至診之兩手脉皆洪大法當下眾僉以妊難之予曰經云有故無殞亦無殞也妊已九月將解即胎動奚傷若當下不下不獨其痛難忍而變且不測考功是予言而請藥予即用小承氣湯加蘇梗砂仁下之而安考功偶冒風頭痛倦怠發寒熱如瘧脉浮絳而數予曰此小柴胡湯症也一劑而瘥考功請告家居者二十年篤好方書予初之茗茗人未知予考功聞予亟欲識之謂予治病甚奇又與予論傷寒痘疹胎產皆中窾深然之語人曰良相良醫等爾如孫君所詣即千金不足為其重特譔醫說書於冊以不朽孫君云二

張孝廉後渠丁年患大頭疫頭大如斗不見項唇垂及乳色如紫肝昏憤不知人事

見者駭而走其年疫甚癘人畏傳染至廢吊慶張與考功公子同受春秋於會稽陶春源所陶邀予診之其脉皆浮絃而數初以柴胡一兩黃芩支參各三錢薄荷連翹葛根各二錢甘草一錢服三劑寒熱退絃脉減但洪大予知其傳於陽明也改以貫衆一兩葛根天花粉各三錢甘草一錢黑豆四十九粒一劑腫消其半再劑全消漿粒不入口者二十一日再與小柴胡湯兩劑服之始納乾糕如指者兩條次日進粥而漸平矣丁酉秋聞報捷三

吳江孫質庵老先生行人時患痛瘋兩手自肩顛及曲池以至手梢兩足自膝及跟尻腫痛更甚痛處熱飲食少請告南還而伏蓐者三年里有吳君九宜者沈考功西席也見予起後渠疾因語行人逆予診其脉皆絃細而數面青肌瘦大小腿肉皆削予與言此病得之稟氣弱下虛多內以傷其陰也在燕地又多寒經云氣主煦之血主濡之今陰血虛則筋失養故營不營於中氣爲寒束百骸拘攣故衛不衛於外營衛不行故肢節腫而痛痛而熱病名周痺是也治當養血舒筋疏濕潤燥使經絡通暢則腫消熱退而痛止矣痛止即以大補陰血之劑實其下元則腿肉復生稍愈之後願加珍重年餘始可出戶行人聞而喜曰果如公言是起白骨而肉之也吾即未藥病似半去惟公命劑予先以五加皮蒼朮黃栢蒼耳子當歸紅花以仁羌活防風秦朮紫荊皮服之二十劑而筋漸舒腫漸消痛減大半更以生地龜板牛膝蒼朮黃栢晚蚕沙蒼耳子以仁海桐皮當歸秦朮三十劑而腫痛全減行人公益喜予曰病加於小愈公下元虛憊非歲月不能充實古謂難足而

易敗者陰也須痛戒酒色自培本根斯飲藥有效而沉疴可除據公六脉輕清流利官必腰金願葆真以埃之萬毋自輕來春氣和可北上也乃用僊茅爲君枸杞子牛膝鹿角膠虎骨人參爲臣熟地黃黃栢晚蚕沙茯苓蒼耳子爲佐桂心秦芫澤瀉爲使密丸服百日腿肉長完精神復舊又喜語予曰貧官何以稱報譏次公濟人澤物盛德於沈考功冊後以彰盛美云後十年行人官至江西副憲四

鄭都諫春寰公長君四歲患痘稠密煩燥醫者星羅皆以爲熱盛不退形枯色紫頂有焦勢症逆必不可爲將辭去予至細觀之見兩太陽圓淨神氣蒼厚謂當急爲涼血解毒用赤芍藥生地黃各三錢紫草二錢連翹黃芩貝母山查木通各一錢蟬退甘草各五分藥成劑而衆止之曰麻要清涼痘要溫故博愛心鑑以保元湯爲良吾儕將劑而進之乃公獨主寒涼保元之謂何予曰用藥貴對症保元湯良矣必血活熱清而後可用今血熱毒盛而用溫劑是火熾添油也衆曰若慮毒未解吾芎藭法甚佳用桑虫雞冠血酒調服之痘即立起而慎氏王氏茅氏皆莒上專門名家亦以爲言予曰此法亦可用於清解之後經曰諸痛瘡瘍皆屬心火火未退而用是以毒攻毒其勢愈熾予故欲先清解而後保元也惟楚銅壁山人黃桂峯者治痘高手也獨語鄭公曰孫公之劑實與症對衆論皆膠固不達變者第恐清解之劑用遲一日爾試煎服之以觀其後鄭公命僕速煎衆猶持議曰如必服此劑亦當揀去貝母山查鄭公聽其減去至夜予始聞隨語桂峯曰減去二味恐七八日後不能無它症桂峯曰何以故予曰此痘內傷外感俱未清楚今帶熱



而出故其腹猶膨脹去貝母恐搶喉去山查恐洩瀉七八日痘毒出盡腹內空虛變從虛出諸君素以痘專科何不慮及此其夜服藥後即嗒然而睡天明痘色明潤焦頂盡退血亦漸活惟嘔噦搶喉衆又以昨日之劑太寒所致予曰此火毒未盡徹也宜進竹茹湯而慎雲峰怫然曰吾家世世業痘年亦七十有五曾未見治痘用竹茹者春寰公令弟樂津公檢痘疹全書用竹茹者以正慎語塞悻然而去藥進而曠止至八日果洩瀉發痒予以保元湯加白朮以治瀉大加何首烏以止痒一帖而痒止至十四日天庭兩顴皆回漿作靨惟兩頤漿未回洩瀉不止予因偶出北門半日歸見其口開項軟手足痘氣盡瀉腹又作脹已成內攻舉家啼泣予亦茫然不遑爲計嘆息出門樂津公把而送之少間揖別而聞衣間痘臭語樂津曰公聞臭乎曰聞予曰似有生意亟還起之予思兩頤乃腎經部位獨不回漿者腎元虛也峻補腎元庶可使活先以紫河車一錢用酒漿調服固其元氣服後即睡繼以人參一兩黃芪兔絲子各三錢作大劑服之一日夜服人參一兩八錢黃桂峯是夜自松江還時已四鼓亟叩門而入鄭語之變且告之服藥黃曰埃吾看作何狀見其結靨之下腹灌一線黃漿贈痘盡起桂峯曰萬全矣非孫公不能起此病桂峯由此益昵予出必聯舟歸則同榻相印正者三年鄭公感予而作序以贈親書孫憲副公冊後識不忘也五

張文學子心二尹可泉公長君也自知醫弱冠病吳下名醫皆診之僉曰療治久不効子心亦自分必死督家人具秘器已沐浴衣襪衣而臥正寢斷粒絕藥者二日

可泉聞予治其高第張星岳之嫖奇因訪予曰病心痺而尸寢浹旬者能起之誰不嘖嘖稱公高手吾子病且革幸憐而診之予至診其脉左寸短弱右關畧絃餘皆洪大其症咳嗽下午熱從兩足心起漸至頭面夜半乃退而色青形羸氣促多夢遺交𠄎臥床褥奄奄一息耳時則七月初旬也診畢語可泉公曰郎君病可治不宜豫凶器也可泉公曰諸醫僉謂火起九泉者十不救一大肉盡削者死咳嗽加汗者死脉不爲汗衰者死又當砭鑠石流金之候又恐肺金將絕豚子亦自謂無生理先生何言可治也予曰汗多者孤陽幾於飛越也可泉公曰飛越亦死候也予曰幾者將成未成之辭也症雖危其色其聲音其脉尙有生意終不可以一凶而廢三善兩顙不赤心火未焚也聲音不啞肺金未痿也耳輪不焦腎水未涸也相書云面青者憂疑不決左寸短者心神不足關畧絃者謀爲不遂夫心者萬事萬化之主內經曰主明則下安主不明則十二官危又肝主謀爲胆主決斷謀爲不決故色青症與色與脉皆非瘵也蓋郎君志願高而不遂其欲殆心病非腎病也經曰色脉相得者生予故謂郎君之病可起也病者聞言明目語其父曰吾今猶寐者初寤矣從來未有此論沁吾心脾也吾病由星士許決科於癸酉是年予落第而同窓者中故怏怏至此先生得吾心於色脉神矣此言可當藥石謹拜命予爲定方煎方名調肝益神湯以人參酸棗仁龍骨爲君丹參石斛貝母麥冬五味子爲臣山梔香附爲佐服二十帖而病起丸方則大龜板熟地黃枸杞子人參麥冬五味茯苓密丸服三月而精神健肌肉完次年生女可泉公莒中名士奇

予治而延譽聞於大宗伯董潯陽公宗伯交驩余者由可泉公始也六

大宗伯董潯老年六十七有脾胃疾翁以過啖瓜果而胸膈脹痛時當處暑也延予治 其脉寸關絃緊觀其色神藏氣固翁門下蔣虹橋沈樂聞者多藝人也翁素親信二公詰予曰症脉何如予曰症脉雖胸腹腸痛然易瘳也二公曰翁生乎不能素食食輟瀉今不茹葷者半月燕居好奕好看書好作詩文即盛暑亦手一編不言倦日永亦不瞋今不親筆硯者月餘不櫛沐者七日它一切無所事事極矣諸名家如沈竹亭沈春宇金樗丘者劑備嘗之無益也而公何言易予曰諸公不過用二陳平胃加山查麥芽等消導劑耳與症何涉蓋翁傷於瓜果而爲寒濕淫勝經云寒淫所勝治以辛温然瓜果非射香肉桂不能消此諸公所以不能愈翁疾也予以高良姜香附各一兩爲君肉桂五錢爲臣射香一錢爲佐每服二錢酒調下之藥入腹胸次便寬再而知餓三服而巾櫛交接賓客如未病者翁語沈蔣曰孫君所見所養度越諸人若是往聞治張氏子氣絕兩日而能活之今於活吾病益信誠臨菑虢國之遺特書一軸以彰其高因以紀一時之良遇云七

大宗伯郎君董龍山公夫人爲憲副茅鹿門公女年三十五而病便血日二三下腹不疼諸醫診治者三年不効予診之左脉沉澹右脉漏出關外診不應病予竊謂血既久下且當益其氣而升提之以探其症迺用補中益氣湯加阿膠地榆側柏葉服八劑血不下者半月彼自喜病愈矣偶因勞而血復下因案前藥予語龍山公曰夫人之病必有瘀血積於經隧前藥因右脉漏關難憑故以升提兼補兼澀



者以探虛實耳今得病情法當下而除其根也龍山公曰三年間便血雖一日二三下而月汛之期不爽每行且五日如此尚有瘀血停蓄耶予曰此予因其日下月至而知其必有瘀血停蓄也經云不塞不流不行不止今之瘀實由塞之行也不可再澁古人治痢必先下之亦此意也公曰明日試卜之予曰卜以決疑不疑何卜公隨以語夫人夫人曰孫先生非誤人者識見往又出尋常宜惟命蓋夫人讀書能文聰明謀斷不啻丈夫故言下便能了悟即用桃仁承氣湯加丹參五靈脂荷葉蒂水煎夜服之五更下黑瘀血半桶其日血竟不來復令人索下藥予曰姑以理脾藥養之病根已動埃五日而再下未晚也至期復用下劑又下黑瘀如前者半繼以補中益氣湯參苓白朮散調理全愈八

大宗伯董潯老門下有馬廚者七月初旬病病二十餘日愈劇而勢甚獷時宗伯對余奕正酣而蔣虹橋沈樂閒報曰馬廚危在旦夕宗伯聞之推枰嘆息曰吾命吾命予叩其故語曰能廚者不下二十人獨此廚適吾意將恃之以怡晚節今病不可起柰何予詰何病翁顧蔣與沈曰第詳道其狀蔣沈述其症大發寒熱寒至不憚入灶熱至不憚下井痢兼紅白日夜八十餘行腹痛惡心汗多神氣倦甚究其脉曰脉不吉下痢脉洪大者死細微者生今洪大逆也予曰痢固忌洪大寒熱亦非細微所宜其中必有故二公曰幸一往決之潯翁不可謂何可以細人而勞長者予曰醫寄人生死何論巨細矧事翁之人猶不可坐視不救也潯翁欣然握余手偕行至宅後橋余入門同居數十家皆執香拱立以伺診其脉察其症果如蔣

沈所言其面色微紅汗淋淋下予究病所由起渠謂過客衆廚間燥熱食瓜菓菱藕過多晚又過飲御內而寢於樓簷之下次日即寒熱腹痛因而下痢雖得其病情尙未融通一治法因沉思之不覺行至橋而溥老猶立而喚予見予無齷容知病重遂置之因如前握余手而回蔣沈謂予可治否予曰微幸先生寵靈偶有一得迺背水陣也人參白朮石膏滑石各五錢知母炮姜各三錢大附子炙甘草各二錢作一大劑煎之蔣沈將問予溥翁即命近侍煎於其側不欲蔣沈問也熟則付飲之飲訖即睡老先生曰服後何狀爲佳予曰偷得一睡則陰陽始和利則汗可斂而寒熱嘔惡可止也蔣沈曰聞已睡矣明日巳刻二公鼓掌來言夜來痢減半汗吐全無脉亦斂矣再用人參石膏白朮芍藥滑石各三錢炮姜肉桂知母各二錢炙甘草附子各一錢服後瘥止痢又減半飲食漸進神氣漸轉改用白芍藥酒炒五錢人參白朮滑石各二錢甘草陳皮炮姜肉桂各一錢三劑而痢全止飲食加漸就安蔣沈問曰公寒熱均投此爲何症而劑何名也予笑曰此溥公所謂混沌湯也溥老又問予對曰經云夏陽於暑秋必瘧痢白虎湯益元散皆解暑之劑瓜菓寒涼傷其中氣酒後御色損其下元附子理中湯正所以温中補下者內經文云實者邪氣實也故以白虎湯益元散應之虛者正氣虛也故以理中湯應之若以寒熱均用爲疑而張仲景附子甘草瀉心湯旣用大黃黃連又用乾姜附子此何說哉蓋假對假真對真也溥翁躍然喜曰先生惟是故能起垂斃之人而生之余詩冊中臨菑虢國之談非虛語矣九

吳江吳太僕長君肖峰令政太宗伯董潯老次女也患咳嗽體倦多汗腹痛呻吟不絕口者半月吳江之醫不効訪遠近名最著者如姑蘇盛氏後湖王氏后山震澤沈氏竹亭先後遞治之而痛愈加予適寓苕城龍山公邀予乘快舡兼程而進至則診其脉左手三五不調右手沉絃面色青而息甚微腹中漉漉有聲予因問上年夏月曾病否肖峰曰曾頭痛體倦多汗動止無力不能親事但不咳嗽不腹痛今五月初病如上年而市醫謂傷風所致用參蘇飲表之始咳嗽沈爲其清嗽則加腹痛王與盛謂通則不痛以沉香滾痰丸下之則勢憊而不可支予方殫思謂此迺注夏病仲景謂春夏劇秋冬瘥者是也而龍山公詰問注夏何爲咳嗽予曰原不咳嗽由參蘇飲而咳嗽也汗多又重發汗肺金受傷故燥而嗽何爲腹痛予曰原不腹痛因治嗽而寒其中氣腹故痛也後事者又不究其因寒而痛乃謂通則不痛而用寒涼滾痰之劑重傷其中氣不思五月六陽之氣皆散於外汗而又汗汗多則亡陽夏至一陰將萌腹中尙虛虛而復一下多則亡陰陰陽俱亡不憊何待予欲酌一方以起之恐從事者又將議其後龍山促之乃用酒炒芍藥五錢甘草黃芪各三錢桂枝二錢大棗二枚水煎臨服加飴糖一合吳下諸公果羣然又辨龍山公曰不必辨病者望此以甦其生速煎飲之飲訖而睡自已至中不醒先事者皆搖首命僕急携藥囊將去且語龍山公曰奪命之速者孫君也本草云夏不用桂伐天和也諸痛不補助邪氣也故一飲而不醒吾儕行矣龍山公以其言詰余因詰病者之熟睡予曰所喜者以其睡也睡則陰氣生陰生則汗可

歛痛可止也假令藥不對症安得有此又詰所投之劑何名予曰此仲景小建中湯也出金匱要畧蓋建者立也中者陽明所主今腹痛如縛帶脉急縮也東垣治例腹痛以芍藥爲君惡寒而痛加桂甘草緩帶脉之急縮用以爲臣經曰急者緩之面青脉絃肝氣盛也肝屬木木盛則脾土受制而又誤下因傷之極故痛之猛也經云木得桂而枯佐以黃芪伐肝補脾又能歛汗止痛此建中之所由名也語未竟內報病者醒而索粥予曰與之穀氣進則有本矣粥後又睡至天明腹全不痛惟稍咳嗽加五味子麥門冬兼治注下而全瘳焉龍山公述病之始末劑之藥味報大宗伯宗伯公致書於予曰足下以四味之常藥振不起之危疴名震三吳聲溢兩浙昔宋景濂爲朱丹溪立傳吾固不敏幸先生以所治節條付之俾序以傳於後俾工是術者有所藉手予憮然語龍山公曰何修而得老先生寵幸之深也第令妹被尅伐太過陰陽俱亡今病雖愈而脉絃不退猶可爲慮幸叮寧戒暴怒節飲食謝去人事恬澹多補庶可永年不然亥月陰極陽生恐不能保無患也慎之慎之後至期與肖峰齟齬怒而絕藥果以凶聞莒人多予之直與先見云十

大光祿龐公子遠吳江人也其太夫人病頭痛惡寒胸鬲懣且痛時發寒熱吳醫王后山者有時名吳人最所篤信延治五日不瘥聞予居吳禮致爲治診其脉右滑大左浮絃而數問服何劑光祿公曰不識而有藥在予視之偶失言曰左矣時有西席項姓者聞言而厲聲曰此三吳最名士也渠發劑而有議者輒面唾之幸不在爾予笑曰渠是而議者非則當唾人渠非而議者是自唾且不暇何暇唾人四



物湯玄胡索牡丹皮香附子養血調經劑也太夫人七十餘矣而有經可調哉投劑之左由生平守常套而不知因人因症隨俗為變也項子曰此何症予曰仲景有云頭痛惡寒外感病也浮絃而數胸膈懣痛少陽脉症具在右脉滑飲食滯而為痰彼用當歸地黃芍藥皆滯痰閉氣之味內傷何由得消外感何由得出此症只宜用柴胡湯合平胃散一二帖可瘳也項猶有言光祿公曰勿辨飲藥而涇渭明矣一飲而寒熱除再飲而胸膈泰光祿喜曰奇公名不虛附矣予私問項子何極譽王光祿曰項初受業於王未睹大方而獨是其師說多見其識之不廣也十

光祿公後有事於莊所值中秋乘酒步月失足一跌扶起便脅痛不能立晝夜不寧行血散血活血之劑一日三進閱三月服二百餘帖痛不少減因迎予治膠之脉左絃右滑數予曰此痰火症也公曰否賤軀雖肥生平未嘗有痰徒以遭跌積瘀血於脅間作痛爾予曰據脉實痰火也痰在經絡間不在肺故不咳嗽而亦不上出脉書云滑為痰絃為飲予據脉而認痰火如瘀血脉必沉伏或芤或濇也面色亦必帶黃前諸君以瘀血治者百徇公言不以色脉為據且多服峻厲剋伐破堅之劑無効此非瘀血之積明矣公欣然請藥即用大瓜蒌帶殼者二枚重二兩研碎枳實甘草前胡各一錢貝母二錢與四帖公以為少予曰愚見猶以為多此症服此一二劑可瘳又即製補益之藥可也公得藥一更矣仍前服五更腹中澀又有聲天明大瀉一二次皆痰無血痛減大半再服又下痰數碗許痛全止

隨能挺立三服腹中不復有聲亦不瀉蓋前由痰積瀉也今無痰故不瀉公曰望聞問切四者醫之要務人人皆著之口吻有先生獨見之行事即予母子之疾先有事者皆吳之名流微先生告殆撞壁矣何能還轅而生哉吾於是益服先生之高十二

進賢三尹張思軒公與潘少保印川公皆受室於施氏稱聯襟云施故富家而張公夫人賢慧治家勤篤爲人精潔周致以產多而氣血憊又以婚嫁繁而費用不支積憂年將五十因病心痺發則暈厥小水短澀胸鬲痛不可忍煩躁乾噦惡內蒸熱氣贖又上騰肌削骨立月汛不止茗城時輩有認爲氣怯者有認爲鬲食者皆束手無措尸寢浹旬漿粒不入口者五日凶具備而待斃舉家計無所之惟神是禱予適在潘府逆予眇之脉左絃大右滑大而數膠膠予曰可生也病機云諸逆吐酸皆屬於火諸風掉眩皆屬於木法當調肝清熱開鬱安神諸醫羣然目攝而背謔曰書云骨蒸肉脫者死形瘦脉大胸中多氣者死絕穀食者死孫君獨許其生果藥王再世哉予若不聞而檢藥以進竹茹滑石各三錢白荳蔻仁七分半夏麴橘紅姜連茯苓各一錢甘草五分水煎令一口口嚥之服畢噦止暈定次日用温胆湯調辰砂益元散三錢服之胸鬲頓開漸進飲食小水通長煩躁盡滅駸駸然安若無事後用逍遙散六君子湯加黃連香附三越月而肌肉全精神如舊苔人駭然曰能起此病信藥王矣十三

馬二尹迺庵公年五十五以掃墓而過食鰾肉捲餅心腹脹痛市醫不知用吐而遽

用硝黃下之大便不行脹痛愈增繼至者以用木香檳榔丸繼又有下以小承氣湯者有下以大承氣湯者十日多脹痛益甚飲食粒不能進大便並不行小水亦僅點滴後醫又以大黃茫硝多服不行謂非白餅子不可服五日而脹痛尤加又謂非備急丸不可服三日脹痛益不可當又用甘遂芫花大戟牽牛之屬服三日不惟大便不行并小便點滴亦無矣脹不可言衆醫大叫稱怪自三月初二日起至是念二日矣有名士王南野者用灸法灸中脘三十餘壯毫不爲動因斷其越三日爲念五戌時當棄人間迪老四子皆逢掖聞言涕泗時有張太學懷赤者迪老甥也見予起張思軒夫人疾喻亟請予至觀其色蒼黑神藏不露聲音亮惟腹大如覆箕不能反側診其脉兩手皆滑大兩尺尤有力究其受病之源查其歷服之藥予駭然以爲未聞且見也因思一治法先用六君子湯加木香砂仁參朮俱用二錢乃傍有錢小松者自稱家世受醫見劑爭之予曰非若所知也彼猶喋喋詰予謂人言中滿者瀉之於內大小便不利者當先利大小便然歟予曰非人言素問云云也又云諸痛不得用參朮蒼黑之人尤忌先生既知素問藥何不用通而用塞也予愀然不答顧迪老諸子言曰錢君拘儒常見何能起尊君病尊君非中滿鼓脹症內傷症也當始傷時猶在上鬲法當用吐素問云在上者因而越之是也不用吐而用下藥以傷其脾胃氣傷則失運動之職是以愈下愈傷愈傷愈脹不思脾氣傷而神不爲用藥不能行以峻厲之味益下之是遵何說也予因脾傷故用六君子湯以醒其脾木香砂仁助其運動再用吐法吐出前藥予劑

非治尊君之病治諸君藥也予初欲爲諸君諱何錢君激予而使暴其短哉且予不慮大便不行獨慮行之不止也錢又謬言急則治標今法用盡不能使一行何以不止爲慮予曰君試思常人能服硝黃幾何服芭荳白餅子幾何今硝黃服過五斤芭荳白餅之屬服過五六兩又加甘遂牽牛芫花大戟至悍至急之劑幸而大便未行藥性未動尙可爲計若一行而諸藥性動譬瓶水底漏其中能蓄點滴哉厄矣錢又詰迪老多服下藥而大便不行何也予曰此易知之始爲食傷繼爲藥傷所傷在上中二焦下元未損故兩尺脉尙有神氣難經曰人有兩尺如樹之有根也內經曰腎者胃之關蓋腎主大便觀其色蒼黑神藏氣固皆由根本未動賴此猶可爲也服藥後腹中大痛予知其藥力已動改用人參蘆防風蘆升麻桔梗各三錢水煎服之少頃用鵝翎探喉中令吐之前服藥物一湧而出十數碗病者以手加額曰目前光矣此已時也予曰酉時大便必行可預買人參數斤以備不虞至午進至寶丹一帖以溫中氣未申間腹中汨汨有聲濁氣下滾頃刻間腹寬數寸至晚大便秘行一次小水畧通予即用人參白朮各五錢炮姜三錢茯苓二錢木香甘草各五分陳皮一錢令急煎服四鼓又大便一次小水繼至脹痛漸減次日大便瀉十次餘因以前理中湯劑爲丸與煎劑兼補腹脹全消飲食漸進共瀉七十二日服人參二斤餘莒人聞以補收功羣然異之而錢小松始帖然心服曰奇哉奇哉人多用攻孫君獨用補人多用下孫君獨用吐由見之眞而所投者確也醫可易言哉今而後知孫君之高矣十四



潘大司馬公嘗有腸風之疾八月丁祭學博餽鹿血食之而血暴下致予治用槐角子五錢黃連枳殼地榆貫衆各三錢一服而止大司馬善其方書之粘壁間遇有便血者輒依方藥之無不立愈喜甚鼓腹謂諸子曰往而姨之疾族醫無不言必死孫君獨能生之神哉進乎技矣予曰昔扁鵲有言予非能生死人也此當自生者越人使之起耳予何能亦張安人當自生也大司馬公由是益重予病無巨細悉任之而予亦得盡其術云十五

迪老之子鳳林見予起乃翁疾乘間語曰內子包有隱疾每月汛行子戶傍輟生一腫毒脹而不痛過三五日以銀簪燒紅針破出白膿盡餘而消不必貼膏藥而生肉無疤痕初間用針刺近只以指搯之膿即出但汛行即發或上下左右而無定所第不離子戶也于今八年內外科歷治不效且致不孕先生學博而思超幸爲籌之予沉思兩日而悟曰此中焦濕痰隨經水下流壅於子戶也經下而痰凝故化爲膿以原非毒故不痛用白螺螄壳火煨存性爲君南星半夏爲臣柴胡甘草爲佐麪糊爲丸令早夜晚服之未終劑而汛行不腫次年生女十六

舜田臧公吳車駕湧瀾公岳也年將六旬爲人多怒多慾胸膈否脹飲食少時醫治以平胃散枳朮丸香砂丸不効復以檳榔三稜莪木之類日消之而大便溇瀉兩足跟踝皆浮腫漸及兩手背醫又以其手足浮腫而認爲黃胖者以針砂丸與之腫益加面色黃且黑自二月醫至八月身重不能動止又有以水腫治者車駕公雅善予因延診之脉沉而濡弱予曰此氣虛中滿病也法當溫補兼升提庶清陽

升則大便可實濁陰降則胸膈自寬以人參白朮各三錢炮姜回陽陳皮各一錢  
茯苓黃芩各二錢澤瀉升麻肉桂蒼朮防風各七分三十帖而安客有疑而詰予  
曰此症諸家非消導則淡滲而先生獨以溫補收功腹中積而爲滿爲腫者從何  
道而去也予曰脹滿非腫滿比也故治不同腫滿由脾虛不能攝水水滲皮膚遍  
身光腫今脹滿者先因中虛以致皮脹外堅中空腹皮脹緊象鼓故俗名鼓脹盖  
由氣虛以成中滿若氣不虛何中滿之有氣虛爲本中滿爲標是以治先溫補使  
脾氣健運則清濁始分清濁分而脹斯愈也十七

金谿令淨涵臧公尊堂太夫人以季春眉壽連看戲文二十餘本且多食魚腥蝦蟹  
偶發寒熱三日不退第四日左耳前後及頰車皆紅腫第五日右邊亦腫第六日  
腫及滿頭紅大如斗眼合無縫昏憤不知人事譫語若有邪祟粒米不進者八日  
舉家驚惶逆予爲治診其脉六部皆洪長而數予曰此大頭疫也即以貫衆石膏  
各六錢柴胡葛根各三錢赤芍藥天花粉各二錢甘草一錢黑豆四十九粒煎服  
之日進二帖脉始減半第九日方進粥飲半盂前藥除石膏又四帖而安是役也  
人皆爲予危且以八十之尊年八日之絕粒頭大如斗體熱如燔炭昏憤譫語乃  
不去而治何冥行不知止如此而其婿閔懷海亦言病勢如此吾心亦危疑見先  
生安閑而甘寢食賴以少慰予曰此疾爲陽明少陽二經熱壅而然夫陽明多氣  
多血之經也以高年故不敢用硝黃惟投以輕清解散之劑使因微汗而解症脉  
相對雖重可生假如人言以高年病危而棄不治豈惟非醫之存心於病家相托

之意亦孤矣可乎哉十八

丙申夏見所潘公謁予於海陽邑邸時霪浹旬邑市水漲公至予驚問曰公貴倨也者何堪此公曰與君間者闊矣且先君服闋秋當北上不卜補任南北謁求一診他何計予究何疾公曰無第年甫踰疆微覺陽痿次早診畢語其隨行俞金二子曰公脉上盛下虛上盛爲痰與火下虛爲精元弱切宜戒色慎怒劑宜清上補下不然三年內恐中風不免蓋由痰生熱熱生風也謹之識之乃爲立方別去公亦未暇製服公次年八月往返武林不無勞怒又屆中秋連宵酒色平常色後輟用鹿角膠三錢人參一錢酒送下以連宵有犯乃用鹿角膠五錢人參三錢空心服之十七日薄暮偶與社友談詩筵間左手陡然顫動把捉不住隨歸房左手重不能舉十八日早左邊半體手足皆不爲用矣亟令人逆予予適在前坵吳宅及至公驚喜交集曰君何先見若此也先少保患在左體不遂者三年而歿不佞今亦左體其風水致然歟第先少保年七十餘不佞四十有七先少保不能遇先生不佞賴有先生或可企無恙也予始觀面色赤口微嚅向右唇麻手足躄拽已成癱瘓疹其脉左絃大右滑大先用烏藥順氣散一帖服後昏睡半日醒覺面更加赤嚼亦稍加知痰盛使然即以二陳湯加全蝎姜蚕天麻黃芩石菖蒲紅花秦朮水煎臨服加竹瀝一小酒盃生姜汁五茶匙一日兩進晚更與活絡丹服至第六日手指梢頭畧能運動足可倚棹而立予喜曰機動矣改用歸芍六君子湯加紅花鈎藤天麻竹瀝姜汁服二十帖行可二十步矣手指先麻木不知痛痒至是能

物繼用天麻丸兼服全鹿丸調理百日病去十之九次年二月北上補任永清公以病後能戒色斷酒自知培養故藥功獲奏此症予歷治歷効者良由先爲疏通經絡活血調氣然後以補劑收功惟經絡疏通宿痰磨去新痰不生何疾不瘳此治類中風之法也十九

見所公弱冠隨尊君大司馬印老治河居北患白濁精淫淫下自北地山東淮楊鎮江及江右三吳諸名家醫藥三年不效癸酉冬禮予診之其脉兩寸短弱兩關滑兩尺洪滑觀其人襟期瀟灑出塵而神色閑雅真翩翩佳公子也一接見便就暱而信余請藥予曰公疾易愈第待來春之仲一劑可瘳而今時不可公固請曰先生大方而善拯人之急以大醫而治小疾試可力效何待來年予曰非秘其術不售也素問有云升降浮沉必順之又曰天時不可伐公脉爲濕痰下流症也經曰治痰必先理氣而脉書亦謂洪大而見於尺部者陽乘於陰也法當從陰引陽今冬令爲閉藏之候冬之閉藏實爲來春發生根本天人一理若不顧天時而強用升提之法是逆天時而洩元氣根本既竭來春何以發生故素問曰必先歲氣毋伐天和必養必和待其來復公疾本小而歷治三年不効者良由諸醫不知脉不識病不按時也公聞言唯唯乃尊君所遣之醫踵接治竟無効至春分而逆予以白螺獅壳火煨四兩爲君牡蠣二兩爲臣半夏葛根柴胡苦參各一兩爲佐黃柏一兩爲使麵糊爲丸名曰端本丸令早晚服之不終劑而全愈公復書曰賤疾果如先生言今勿藥也何歷治三年不効竊謂天下無藥服端本丸而愈又信天下



三 吳 醫 案 卷 一  
有藥矣二十

少司空凌繹老夫人蔣適繹老無幾腹脹痛發熱經過期不行者五日諸醫皆以經期作痛爲調經不效而繹老召予診左寸洪滑兩尺皆滑數左尺之外更有神氣予喜而語繹老曰經閉非病孕也產必男繹老雅信予因究其說予曰滑非經閉之脉左尺尤有神氣是以知產必男也繹老謂果孕矣奈發熱腹痛何予曰何傷氣虛而熱耳以安胎飲加減調理即安也用人參白朮芍藥爲君川芎當歸爲臣香附柴胡蘇梗條芩甘草爲佐四帖腹痛減熱除至期果生子繹老德予而多推轂云二十一

金文學元岩之眷產後兩日腹痛下痢純紅脹鳴三越月時當孟秋而脉皆軟弱用佛手散加減以治川芎三錢當歸五錢艾葉炮姜各一錢桂心五分酒炒白芍藥二錢連進三帖而疾減半後因食新菱新粟又連爲怒氣所激日晡暈厥以生姜湯灌甦腹脅大痛手不可近用二陳湯加香附砂仁桂皮炮姜與之痛亦不減且胸膈脹甚自以手探喉中吐出菱粟痛稍定少頃復痛又用手探吐吐後瀉三四次而元氣脫矣脉皆散亂如解索狀神氣憊而恍惚循衣摸床病勢危急用人參白朮各五錢酒炒白芍藥二錢砂仁炮姜肉桂甘草各一錢急煎進之痛乃稍定精神清仍瀉二次次日復進前藥痛減瀉止加白朮又四帖而飲食進精神勃勃興起矣此因初痢時醫者不以產後爲重徒以治痢苦寒之劑傷其中氣又爲菱粟生冷所損中氣益壞然也治可不慎哉二十二

沈三石別駕公夫人嚴產三日而腹不暢南潯女科陳姓者爲下之大瀉五六次遂發熱惡心又用溫胆湯止吐小柴胡退熱服四日熱吐四日粒米不進亦四日又進八珍湯加童便服後昏憤耳聾眼合口渴腸鳴眼胞上下及手足背皆有虛浮因逆予治診其六脉皆數時五月初二日也予曰脉書云數脉所主其邪爲熱其症爲虛法當以十全大補湯加炮姜進之夜半稍清爽進粥一盃始開目言語次日午時以承值者倦而藥不相接且言語太多復昏昧不知人事初四日以人參白朮各三錢炮姜茯苓陳皮各一錢甘草五分煎服訖體微汗遍身痲痺熱退而神爽下午又藥不接又動怒昏昧復如前六脉散亂無倫狀如解索痲痺沒而虛極矣亟以人參白朮各五錢炙甘草炮姜大附子各一錢連進二帖是夜熟寢唯呼吸之息尙促初六日脉又數下午發熱不退環跳穴邊發一毒如碗大紅腫微痛夫人父嚴翁與陳女科交譜之曰向之發熱惡心皆此所致由附子乾姜溫補誤也須急用寒涼解毒之劑予正色而諭以理曰此乃胃中虛火遊行無制大虛之症非毒也若作毒治而用寒涼速其死爾內經云壯者氣行則愈怯者着而成病惟大補庶可萬全三石翁然予言急煎附子理中湯進之日夕兩帖參朮皆用七錢服熱痲痺復出毒散無踪熱亦退沾沾喜矣復以參苓白朮散調理而全安皆由產後誤用下藥致變百出噫唏彼不達變之專科其可任哉二十三

誥封吳太夫人者車駕湧瀾公母也年餘六十久患白帶歷治不效變爲白崩逆予治之診得右寸滑左寸短弱兩關濡兩尺皆軟弱予曰據脉心腎俱不足而中焦

有濕脉經云崩中日久爲白帶漏下多時骨未枯今白物下多氣血日敗法常燥脾兼補心腎以既濟丹補其心腎以斷下丸燥中宮之濕則萬全矣服果不終劑而愈既濟丹方 鹿角霜 當歸 白茯苓各一兩 石菖蒲 遠志各一兩五錢 龍骨 白石脂各二兩 益智仁五錢 乾山藥打糊爲丸 梧桐子大空心白湯下七八十丸 斷下丸方 頭二蚕沙炒三兩 黃荊子炒二兩 海螵蛸磨去黑甲 樗根 白皮各一兩 麵糊爲丸 下午白湯送下六十九丸二十四

吳北海太學令政每月經行期之前四肢壘又發塊紅紫脹痛不思飲食胃脘亦常痛經水多不及期診其脉兩手皆駛以症脉參之肝脾二經有鬱火也蓋肝主怒脾主思多思多怒隱而不發鬱滯於中故臨經壘又發紅腫於四肢也以 柴胡 川芎 香附 烏藥 白芍藥 青皮 丹參 玄胡索 鬱金 酒炒黃連 山梔子治之而愈二十五

吳之清客周芻玉者豪放不拘人言有晉人風酒後益恣而好男色因患白濁吳醫有以補中益氣湯升提者有以六味地黃丸補陰者有以五苓散六一散滲利者有爲降火者有爲溫補者不效又以草頭藥亂進之肌瘦如削膝軟如痿患有年所矣因紹介吳太學北海而謁余懇爲治之診其脉右寸關皆數予曰皆由酒後不檢所致也中宮多濕多痰積而爲熱流於下部故濁物淫淫而下久不愈矣與以加味端本丸服之而瘥白螺獅殼四兩牡蠣苦參葛根黃栢各二兩陳皮半夏茯苓各一兩甘草五錢麵糊爲丸令早晚白湯下三錢二十六

丁酉夏予寓雒城顧鄉宦宅其門下竹匠婦懷妊五月而患心痛究其所由起謂由失足墜樓也始教飲韭菜汁一盞而痛隨止其夫又從它醫贖藥二帖歸令煎服服既心復痛吐鮮血盈盆胸間冲又上抵疼不可言危在頃刻竹匠告急予僕孫安安憐之懇予診治六脉皆洪大汗出如雨喘息不相續其婦樓居低小予令亟移居樓下隨與益元散五錢令用紫蘇湯調服又囑之曰今夜若睡聽其自醒切勿驚動汗止即甦也服後果睡至曉汗斂而胸膈不痛喘息亦定再與固胎飲一帖煎服而全安矣先是鄰醫診其脉謂吐血之脉宜沉細今反洪大而汗出喘息不休危在今夜及病起來詢余曰妊婦不得汗不得下不得利小便是謂三禁昨日之劑悉犯之而反獲效何哉予曰醫貴審症蓋婦之患非由病汗以樓居低小當酷暑而熱逼故也汗血去而胎失養故忡忡上捩喘息不續移樓下以避暑氣益元散爲解暑之聖藥而紫蘇又安胎下氣之妙品氣下則血歸原而病痊矣此對症之藥法出王海藏醫壘元戎中四血飲是也特諸君檢閱不徧即檢閱亦不知爲胎產之治余何能不過融會前人之法用之而不膠焉耳隣醫俛首唯唯而退二十七

壬申秋仲予東遊攜李而王松泉吳小峰偕行小峰語予中秋至矣此間一妓李姓者行第七殊可人意須訪之晚令佐酒至則見其態度果澹雅風致坐少頃連咳兩聲小峰究其病曰偶耳小峰謂毋誑孫公知人生死不啻扁鵲可求一診診之兩寸短濇兩尺洪滑關絃予未語而小峰問脉予曰脉甚怪公可問經行否曰行



僅一日亦僅點滴予曰此脉在良家主夢遺若不宜有也妓曰良然即御客時亦或遺遺則冷汗淫淫體倦而不能支小峰爲請藥予曰姑置之小峰問何故予曰金木相勝心神無主法當不治小峰謂人尙無恙何得便至於此予曰絃爲春令當金旺之時猶然猖獗設在卯月木旺火相肺金枯痿水之上源已竭且腎脉洪滑妓以慾勝陰血旣虧淫火愈熾書云陰虛則病陰絕則死今已咳嗽其兆見矣可治乎次年二月果死二十八

有老妓金姓者其嫂三月患頭痛身熱口渴水瀉不止身重不能反側日漸昏沉耳聾眼合夢多亂語嘉秀醫者歷試不效視爲必死予適吳江歸便道過構李訪南溪吉泉二兄吉泉兄以是症見詢且言諸醫有以補中益氣湯進者有以附子理中湯進者二藥已煎成未服幸弟至乞爲診之六脉洪大觀其色內紅外黑口唇乾燥舌心黑胎不知人事予曰此疫症也法當清鮮急以小白湯進之猶可生也若附子理中湯殺之耳安可用南溪兄問小白何湯也予曰小柴胡白虎湯合而一之是也南溪兄謂洩瀉昏沉如此恐石膏不可用也予曰此挾熱下利但使清陽上升則瀉止熱退而神氣自清也服訖夜半神氣甦醒惟小水不利熱渴不退予思仲景法謂渴而身熱不退小水不利者當利其小便乃以辰砂六一散一兩燈心湯調服之兩帖而瘳南溪兄曰死生信乎命也弟頃刻不至必服理中湯此婦不爲泉下人哉二十九

有曹姓諱鏗者九月重陽以胸膈不舒暢而謁南溪兄爲治診未竟予至南溪兄起

語曹曰舍弟高手挽診之診訖未有言而南溪私問曰曹何如脉予曰不治會易貨者杳至予亦別去曹果次年二月死南溪兄問曰向曹無它病而弟見脉卽斷不治何也予曰其脉兩寸洪滑搏指兩關微絃兩尺微弱難經所謂溢脉也九月深秋木彫零時也不宜絃大大則上盛下虛至一月木旺木能生火火木性皆上升不下下無直陰以相濟是有陽無陰有升無降內經曰出入廢則神機化滅升降息則氣力孤危是以斷曹子二月當嘔吐而死也三十

嘉善之妓李雙號素琴體雖肥而性冲澹態度閒雅端重歌調倡家推其擅場與予邑程芹溪處厚患痛風自二月起至仲冬諸治不效搗母慳毒遂視爲痼疾不爲治而芹溪固懇予診之六脉大而無力手足肢節腫痛兩跨亦痛不能起止肌肉消其半日僅進粥二碗月汛兩月一行甚少予曰此行痺也芹溪問病可治否予笑而應曰君能娶予能治之芹溪曰嫁娶乃風月中套語公長者乃亦此言予曰觀此子雖墮風塵實有良家風度予故憐之且君斷絃未續而彼有心於君或天緣也芹溪曰誠吾素願恐搗母高其價而難與言予謂乘其病而盟之易與耳芹溪以予言爲然乞爲治之以人參白朮苡仁各三錢當歸枸杞杜仲龜板蒼耳子各二錢晚蚕沙秦艽防風各一錢大附子甘草桂枝黃栢各五分十帖而痛止腫改用歸芍六君子加苡仁丹參紅花石斛紫荊皮三十帖而全愈芹溪娶之善持家舉族稱賢而亦羨予知人焉三十一

沈別駕翁有老僕頭痛遍身骨節痛面色黑發熱口渴胸膈膨脹飲食七日不入復

感寒人皆危之予診其脉左絃數右洪大以藿香蒼朮防風葛根白芷紫蘇甘草陳皮大腹皮麥芽枳實服後胸膈稍寬熱與痛更甚改以麻黃葛根柴胡各二錢石膏滑石各三錢紫蘇葉白芷蒼朮各一錢甘草五分姜三片服後大汗出而熱痛皆除惟口渴又以白芍藥當歸石膏知母柴胡黃芩麥冬葛根陳皮煎服全愈別駕翁喜詰予曰老僕病甚重無不謂其必死先生三日起之此何症而何湯劑飲之使起也予曰此三陽合病先爲飲食所傷予故先用藿香正氣湯加消導之劑治其本又以六神通解散加助表之藥治其標病雖重年雖高喜其色脉相對故投以對症之藥易愈也翁曰在先生然耳若它人輕者且重况重者乎吾未見其能起也三十二

蔡中林文學內人發熱口渴舌上燥裂小腹痛嘔吐藥食不能入者七日諸醫之技殫矣皆視爲鬲食而不可爲吳我峯翁固邀予診右寸脉絕不應指關沉滑有力左手絃數予曰此陽明少陽合病邪熱壅於上焦然也非鬲食法當解散數劑可愈無恐以軟柴胡石膏各五錢半夏麩枳實黃芩黃連葛根竹茹人參各二錢姜三片煎服藥納而不吐五更下黑糞數塊熱痛減半次日仍與前藥右寸脉至是亦起粥始進改用小柴胡加橘紅竹茹葛根服三帖而全安三十三

吳九宜先生每早晨腹痛洩瀉者半年糞色青腹膨脹人皆認爲脾腎洩也爲灸關元三十壯服補脾腎之藥皆不效自亦知醫謂其尺寸俱無脉惟兩關沉滑大以爲憂以人言洩久而六脉將絕也予爲診之曰君無憂此中焦食積痰洩也積膠

於中故尺寸脉隱伏不見法當下去其積諸公用補謬矣渠謂敢下耶予曰何傷  
素問云有故無殞亦無殞也若不乘時久則元氣愈弱再下難矣以丹溪保和丸  
二錢加備急丸三粒五更服之已刻下稠積半桶脹痛隨愈次日六脉齊見再以  
東垣木香化滯湯調理而安渠稱謝言曰人皆謂六脉將絕爲虛極公獨見之眞  
而下之由公究理深邃故見之行事著之談論皆自理學中來它人何敢望其後  
塵三十四

沈大官左膝腫痛不能起止者年半大便瀉一日三次診其脉絃緊予曰此脾虛有  
濕熱凝於經絡流於下部也古謂腫屬濕痛屬火用蒼朮黃栢薏苡仁爲君澤瀉  
猪苓五加皮爲臣炙甘草防風桂枝爲佐木通爲使四帖痛減腫消洩瀉亦止改  
用蒼朮蒼耳子五加皮苡仁當歸枸杞子杜仲丹參黃栢烏藥葉酒糊爲丸調理  
月餘步履如故三十五

沈繼庵先生下痢十二日腹痛脫肛後重噁氣不知飢一友用補中益氣加白芍藥  
腹痛愈加後重亦甚予脉之右關滑大搏指曰此積滯固結腸胃間故後重脫肛  
也當爲推蕩以其素弱多鬱不敢只爲調氣而兼消導本香山查檳榔枳實川芎  
白芍藥黃連黃芩秦朮服後稍寬次日用七傷丸二帖全愈其內人患發熱頭  
痛遍身痛乾嘔口渴胸膈脹悶坐臥不安醫與以參蘇飲乾嘔愈甚又加煩躁予  
診之右手洪大倍於左左浮數予曰乾霍亂症也與以藿香正氣散減去白朮桔  
梗加白扁豆香薷一帖吐止食進遍身痛除惟口渴額痛未除小水不利以石膏

香薷滑石各五錢橘紅藿香葛根各二錢檳榔木瓜各一錢甘草五分姜三片一帖而愈三十六

沈晴岳先生五更耳鳴腹不舒暢稍勞則烘然熱自汗脉右關滑大有力左脉和緩原爲當風睡臥而得素來上焦有痰火午後過勞或受餓大作眩暈冷汗津津再不敢動稍動則嘔吐此皆痰火所致蓋無痰不作暈也先與藿香正氣散一帖以去表裏之邪繼與温但湯加天麻胆後眩暈嘔吐皆止次日診之右關脉仍滑此中焦食積痰飲膠固已久卒難動搖姑以二陳湯加枳實黃連滑石天花粉天麻竹茹調理後以當歸龍會丸加牛胆南星青礞石凡數帖全愈三十七

潘景宇內人後半夜不睡面黃肌瘦兩太陽及眉稜骨痛大便糖稍勞動則體熱四肢無力其脉左寸洪滑自春至秋皆然此由脾虛肝心二經火盛然也先用四君子加酒連柴胡白扁豆澤瀉滑石調理夜與錢仲陽安神丸數粒燈心湯送下服八日得睡兩太陽亦不痛繼用六君子加黃芩秦芫柴胡澤瀉當歸白芍藥黃栢全安三十八

臧六老上吐血下瀉血胸膈背心皆脹原從怒觸又犬肉所傷故發熱而渴醫者皆作陰虛火動而爲滋陰降火胸背愈脹血來更多予診之兩關俱洪滑有力謂曰此肝脾二經有餘症也作陰虛治左矣內經曰怒傷肝甚則嘔血并下洩胸背脹痛瘀血使然脾爲犬肉所傷故不能統血今誤用地黃麥冬黃栢知母等劑是以脾益傷而上焦瘀血愈滯也惟調氣健脾兼之消導則萬全矣六老曰人皆謂勞



怯故發熱吐紅血上吐陽絡傷也血下行陰絡傷也陰陽俱傷法當不治公獨認非陰虛何也予曰脉書云脉數無力者陰虛也今脉固非陰虛書又曰凡陰虛之熱發於申酉戌間夜半而退明日猶是如潮信然以下午乃陰分主事故曰陰虛潮熱也今熱不分晝夜而症亦非陰虛故曰作陰虛治者左也六老聞言大喜曰公誠見垣一方者幸惠一匕以生之即與山查香附枳實調氣消導爲君丹參丹皮桃仁滑石茅根化瘀血爲臣黃連蘆根解犬肉之熱爲佐四帖胸背寬血吐止惟腹中不舒仍以以前藥同丹溪保和丸與之四帖大便下極臭黑糞半桶寢食俱安矣三十九

有臧氏之婦原以有痰火服降火之藥過多至秋痰積因令氣下行而滯於大腸臍邊有硬塊按之甚痛痢下紅白八日下惟點滴日夜二十餘行腹痛潮熱口渴小水不利大便裏急後重飲食不進身重不能轉側予診之喜左脉皆有神氣即從劉守眞之法行血則便膿自愈調氣則後重自除治之用白芍藥滑石桃仁爲君當歸爲臣木香檳榔山查酒芩酒連枳殼爲佐服下大便稍流利腹中稍寬舒次日仍與前藥則滯下大行痢減大半第三日用芍藥當歸滑石桃仁炙甘草酒連木香與保和丸同服下午大便秘行上午所服丸藥隨糞而下乃知積滯已盡諸症悉減惟臍邊痛未全止以仲景小建中湯加當歸木香服之而安四十

丁耀川文學令堂年四十四常患胃脘痛爛居十五年日茹蔬素其年七月觸於怒吐血碗許不數日平矣九月又怒而吐血如前加腹痛至次年二月忽裏急後重

三身醫案卷一  
一三  
肛門大疼小便短澁出惟點滴痛不可言腰與小腹之熱如滾湯泡者日惟仰臥不能側一側則左胯并腿作痛兩跨原有痛小便疼則肛門之痛減肛門疼則小便之痛亦減肛門以疼之故不能坐遇驚恐則下愈墜而疼經不行者兩月往常經來時腰腹必痛下紫黑血塊甚多今又白帶如注口渴通宵不寐不思飲食多怒面與手足發虛浮喉中梗梗有痰肌肉半消診之脉僅四至兩寸軟弱右關滑左關絃兩尺濇據脉上焦氣血不足中焦有痰下焦氣凝血滯鬱而爲火蓋下焦之疾肝腎所攝腰跨肝之所經而二便乃腎之所主也據症面與手足虛浮則脾氣甚弱飲食不思則胃氣不充不寐由過於愁憂思慮而心血不足總爲七情所傷故爾內經云二陽之病發心脾女子得之則不月此病近之且值火令當權之候誠可慮也所幸者脉尚不數聲音清亮尤可措手因先爲開鬱清熱調達肝氣保過夏令後再爲驟補陰血必戒絕怒氣使血得循經而病可痊不然則倉扁亦難奏功矣初投當歸龍會丸以徹下部之熱繼以四物湯龍胆草黃柏知母柴胡澤蘭葉煎吞滋腎丸連服四日腰與小腹之熱始退後以香薷石葦龍胆草桃仁滑石牡牛膝甘草梢軟柴胡煎吞滋腎丸大小便痛全減四十一

丁文學長令姊常患暈厥吐痰碗許乃甦一月三五發後又口渴五更倒飽腸鳴腹疼洩瀉小水短濇咳嗽余脉之兩寸濡弱兩關滑大此中焦痰積所致也先與二陳湯加蒼朮山查麥芽以健脾去濕爲臣以芍藥止痛爲君以滑石澤瀉引濕熱從小便出爲佐黃芩爲裨佐十帖二陰之痛俱止改以六味地黃丸加黃柏知

母牛膝服之全安四十二

有金良美者年十八患咳嗽吐紅下午潮熱夢遺市醫進四物湯加天麥門冬黃柏知母之類治半年反加左脇脹疼不能側臥聲音漸啞飲食輒惡心肌肉大削六脉俱數醫告技窮因就予治觀其面色白又隱隱有青氣夾之兩足痿弱無力予語之曰此症氣虛血熱而肝脉甚絃絃則木氣太旺脾土受虧不能統血始始怒氣所觸繼爲寒涼之劑所傷以致飲食惡心肌肉瘦削書云脾胃一虛肺氣先絕以肺金不足則肝木愈不能制濁痰瘀血凝於肺竅故咳嗽聲啞滯於肝故左脇不能貼席而臥病勢危矣喜在青年猶可措手因急用人參二錢鱉甲五錢爲君白朮白芍陳皮茯苓通草貝母各一錢爲臣甘草牡丹皮各七分爲佐桔梗五分爲使二十帖潮熱止咳嗽減大半三十帖聲音開亮左脇亦能貼席而臥後以大造丸調理全安矣乃囑之曰病愈雖可喜而絃脉未退須切忌怒氣及勞心勞力之事庶幾可保無虞苟不守予言而勞怒相觸血來必不能禦戒之防之此後精神日王肌體豐肥六年無事一日遇事拂意大怒而又結算勞心則血如泉湧頃刻盈盆上唇黑腫汗出淋漓急請予診脉亂無倫診畢渠語近侍欲大解予曰此死徵也陰陽乖離矣辭而未離門而氣絕父母哭謝予曰始守翁訓苟活六年一旦不戒遂如翁所料死生雖命亦不自慎致之其爲人也量窄而緊於財因記此以戒世之重財輕生者四十三

倪五娘子以中風暈厥之後口眼歪斜左腳右手不能屈伸口渴小水不利兩頰緊

出語艱澁問之則期期而對不問默然亦不思飲食行年五十矣諸醫不效予治始與涼膈散加石膏蒲遠志煎湯化錢氏安神丸二顆服之其夜大便四行次日神氣遂清口眼半正惟車頰尙緊未能開聲細察形氣似弱也即與六君子湯加麥門冬滑石天花粉石膏蒲遠志當歸薄荷服後神思大清爽能自坐不須人扶語言亦稍利改以六君子湯加麥冬天花粉石膏蒲當歸五加皮薏苡仁紅花天麻十帖全愈矣四十四

王祖泉令政患頭疼夜熱洒淅惡寒汗淋漓如雨上身熱下身寒渴不思飲遍身疼腹有一塊大如拳硬如石腸鳴小水短少飲食俱廢脉則右關滑左絃數究所由起謂大怒後卽傷於食市醫皆以地黃門冬芩連黃栢之劑治之熱愈甚脾氣大虛予治用平胃散加山查麥芽砂仁香附木香川芎枳實連進四帖中氣稍能運動而夜熱如前再與補中益氣湯寒熱俱退矣而腹痛裏急後重予知其積滯將行也乃與白六神丸而腹痛後重皆除改進以參苓白朮散加香附烏梅山查服之病良已四十五

溫巽橋子婦吳車駕湧瀾公長女也發熱惡心小腹痛原爲怒後進食因而成積左脚酸痛已十日矣南潯有陳女科始作瘟疫療治嘔噦益加又作瘧治粒米不能進變爲滯下裏急後重一日夜三十餘行陳技窮而辭去且言曰非不盡心犯逆症也下痢身涼者生身熱者死脉沉細者生脉洪大者死今身熱脉大而又噤口何可爲哉因請予治脉之兩手皆滑大尺部尤搏指予曰症非逆誤認爲疫爲瘧

治者逆也雖多日不食而尺脉搏指內經云在下者引而竭之法從下可生也即與當歸龍會丸一錢五分服下去稠積半盆痛減大半不食者十四日至此始進粥一甌但胸膈仍飽悶不知餓又與紅六神丸一錢胸膈舒而小腹軟惟兩跨痛小腹覺冷用熱磚熨之子戶中白物綿又下小水短濇改用五苓散加白芷小茴香白雞冠花柴胡服之至夜滿腹作疼亟以五靈脂醋炒爲末酒糊爲丸三錢白湯送下通宵安寢次日精神清健飲食大進小水通利矣而獨白物仍下再用香附炒黑存性枯礬各一兩麵糊爲丸每空心益母草煎湯送下二錢不終劑而白物無病全愈矣專科赧然稱奇而服錄其案驗而去四十六

溫一渠內人平素血虛咳嗽近爲飲食所傷不知飲餓專科作陰虛治而胸膈愈脹予脉之右關滑大左手軟弱法當先健脾消去飲食然後治嗽若爲滋陰降火不惟咳嗽無功恐脾胃轉傷腹脹瀉洩變將不測何也脾胃喜溫而惡寒也即以二陳湯加山查麥芽枳實白朮川芎香附與之一劑而胸膈寬再劑而飲食進繼用桑白皮地骨皮甘草陳皮貝母瓜蒌仁馬兜鈴楮梗紫苑十帖而愈咳嗽脫然矣四十七

溫異橋二令媳產後五十餘日右脇脹痛手不可近赤白帶多下如膿發熱大便燥結予曰此惡露未盡瘀血化爲膿治宜急也嘗見數婦有此病而不識治積而成毒有成腸癰者有內成腫毒潰從腰俞出者皆以不知治法則瘀血無從出故也急用澤蘭葉山查子五靈脂消惡露爲君川芎當歸茯苓白芷爲臣益母草爲佐



香附青皮爲使外與當歸龍會丸潤大便使熱從大便去服後次日腹脇皆寬痛亦盡止又因食葷與雞子復作疼但不如前之甚墮與保和丸用山查煎湯送下三錢而痛愈矣四十八

溫天衢氏冬月病目醫爲發散太過至春間吐血碗餘及夏下午潮熱咳嗽胸膈脹疼早晨冷汗淋漓大便溏一日兩行飲食少肌肉消十之七脉數據症脉法在不治里中諸長老以其素行端厚羣然懇予措劑予以衆懇不能辭乃用瀉白散加五味子白芍藥貝母馬兜鈴服下其夜粘然而臥不嗽惟大便溏前藥加白扁豆山藥茯苓汗亦漸止復與瀉白散加石斛馬兜鈴貝母陳皮薏苡仁白芍藥山藥五味子桔梗調理三月而全四十九

張二娘子妊七月而嘔吐不止氣壅咳嗽胸與兩脇皆脹不能伏枕予先與金花丸二服以止吐服下立應繼與大腹皮陳皮枳殼半夏甘草竹茹茯苓旋覆花前胡紫苑黃芩生姜服二帖氣平嗽止安然睡矣五十

金花丸者雄黃一錢五分半夏一兩檳榔二錢羌汁浸蒸餅糊爲丸是也

王敬泉內眷患痰嗽腹飽脹洩瀉腸鳴裏急後重發熱口鼻之氣如火塞以六君子湯加山查麥芽柴胡秦艽青蒿白芍藥益智仁與香連丸兼服兩劑氣舒嗽減大便結實鼻仍塞前方加川芎減白芍藥而安五十一

溫南溪內人居常大便秘結面赤不思飲食頭時眩暈診其脉右關尺滑大有力此痰火症也用瓜蒌四錢爲君滑石三錢枳實二錢半夏一錢半爲臣蘿蔔子姜黃

各一錢爲佐兩帖愈矣又教以或遇大便秘結每服當歸龍會丸如牛胆南星一錢立應五十二

陳春野孝廉二令愛患丁奚疔痢四肢浮腫以布袋丸與大安丸同服則大瀉用參苓白朮散加澤瀉山查麥芽瀉亦不止神氣大弱穀粒不入口小水不利大便一日仍三五次積滯未除改以參苓白朮散加肉蓯與服瀉稍止食粥一盞下午因食紅棗數枚夜分痰忽起其勢甚危急與蘇合丸服之而愈再以參苓白朮散加石菖蒲藿香炮姜肉蓯調理全安五十三

潘敬齋令媳原因經水不行醫投安胎之劑越七月經水忽大行內有血塊筋膜如手大者一二桶昏冒困憊爲劇逆予治其脉右關洪滑左寸洪數兩尺皆洪大病形夜分咬牙亂語手心熱口噤時手足皆冷心頭脹悶不快面色青始諸醫皆謂難治予曰無恐此濁痰流滯血海以誤服安胎之劑益加其滯夫血去多故神魂無依痰迷心竅故神昏語亂急爲調氣開痰安神養血可生也即以濕胆湯加石菖蒲酒芩天麻酸棗仁丹參與服其夜子丑時咬牙亂語皆減半次日仍與前藥每帖加竹茹五錢臨睡又與黑虎丹數粒諸症悉去而愈敬齋問曰藉高手病瘥矣而每發於夜半何也予曰此心包絡與胆經有痰熱故每至其時而發單治此兩經痰既消而神魂俱安也敬齋曰善五十四

上舍張懷赤每早晨腸鳴瀉一二度晚間瀉一度年四十二且未有子予診之尺寸短弱右關滑大予謂此中焦有濕痰君相二火皆不足故有此症以六君子湯加

破故紙桂心益智仁肉苳菑煎服瀉遂減半又以前藥加杜仲爲丸服之而愈次  
年生子五十五

臧七房二老夫人年六十八患痢病後過食熟菱與腐湯以致大便滑洩不固飲湯  
水徑直下不停胸膈否悶語言無力舌乾口燥生瘡嚙津液則喉疼元氣大虛而  
熱皆虛火所致且長素二十餘年又當痢後益知非有餘之症也脉又尺寸俱弱  
兩關滑大內經云清氣在下必生滄洩濁氣在上必生臙脹此之謂也法當提清  
降濁補助元氣用四君子湯加葛根白芍藥黃連清虛熱止燥渴爲君桔梗輔佐  
葛根升提清氣爲臣陳皮麥芽降其濁氣以消胸膈否悶爲佐加烏梅爲使上使  
生津下使止濁連服二劑尺寸之脉稍起飲食亦得停腹駸駸然始有生氣仍以  
前方加白扁豆神麩打糊爲丸調理而安五十六

蔡樂川令眷患頭痛痛如物破髮根稍動則痛延滿頭暈倒不省人事踰半時乃甦  
遍身亦作疼痛鬲飽飲湯水停鬲間不下先一日吐清水數次蛔虫三條原爲  
怒起今或惡風或惡熱口或渴或不渴大便秘脉則六部皆滑大有力予曰此痰  
厥頭痛症也先以藿香正氣散止其吐繼以牛黃丸黑虎丹清其人事頭仍疼甚  
又以天麻藁本各三錢半夏二錢陳皮白芷薄荷麻黃生姜葱白煎服得少汗而  
頭痛少止至晚再服之五更痛止大半而人事未全清予謂此中焦痰盛非下不  
可乃用半夏五錢巴霜一分麵糊爲丸每服三十丸生姜湯送下下午大便秘行三  
次皆稠粘痰積也由此飲食少進餘症差可惟遍身仍畧疼改用二陳湯加前胡

石膏蘆本薄荷枳殼黃芩石膏蒲調理而安五十七

周蘆汀乃眷患胃腕痛手心熱嘔吐不食者四日晝夜叫痛不輟聲脉則兩手皆滑  
數予謂當以清熱止痛爲先故先與清熱止痛末藥二錢令服之不一飯頃痛遂  
止而睡家人皆色喜予曰未也此火暫息耳其中痰積甚固不乘時而下之勢必  
再作因與總管丸三錢服下腹中微痛再服二錢又睡至天明乃寤而腹痛亦止  
大便下痰積甚多次日以二陳湯加枳實姜黃香附山梔黃連與之服後胃腕之  
痛全止惟小腹峇覺膨脹予謂其痰積未盡也再與總管丸三錢夜服之天明又  
行一次痰積之下如前而胃腕之痛亦絕不發矣五十八

三吳醫案卷一終



醫案三吳治驗二卷目錄

王文川令郎內傷發黃一

屠侍軒尊眷產昏憤不知人事三

周鑑泉令政傷寒譫語五

王南崗咳嗽氣湧七

陳光祿五更胸膈飽脹九

李悅齋夫人腹痛譫語如狂鼻衄有發明十一

張後溪令孫瘡疥發腫十三

方東楚脊骨痛牽引胸腹皆痛十五

張近川胃脘痛十七

李古愚胸膈飽悶大便濇泄十九

姚老夫人右手疼二十一

一僕時疫頭痛如破二十三

馬鳳陽咳嗽內熱二十五

嚴柱史令媳腹中有塊疼痛二十七

張道南內人腹痛二十九

馬迪庵內人奇痰症三十一

張裕齋惡寒發呃三十三

施涇陽先生內人痰火二

屠學恒迺眷產後作瀉四

臧顧渚老先生兩耳揪痒六

張桃津迺政小產後臍下痛八

溧水令君夫人五更倒飽洩漏十

吳仲峰脾洩十二

張五橋夫人喘嗽十四

張淨宇發熱腹痛洩瀉嘔吐十六

閔文川公肛生一毒膿潰不收口十八

姚惠齋夜多洩瀉二十

一僕時疫頭痛發熱二十二

一僕時疫嘔吐煩躁口渴二十四

倪二南內人小水不禁二十六

陳鹿塘脹風臟毒大便燥結二十八

張道南尊堂隔上痰飲痞而惡三十

董老夫人眩暈三十二

嚴老夫人胸膈痞悶三十四

王谷泉頭眩洩瀉汗出不止三十五

一婦懷孕內熱咳嗽三十七

倪二南內人小產小腹痛暈厥三十九

倪少南內人經行如崩頭暈四十一

姚娘子小腹痛四十三

徐文學三泉令郎右脇脹痛四十五

費少垣乃眷孕痰喘胎逆四十六

六娘子遍身痛汗大出昏昏如醉四十八

姚弁山內人胸脇痛五十

周衡宇咯血痰火作痞五十二

鄭春元頭痛內熱五十四

張麗川咳嗽多痰冀門發瘦五十六

張溪亭乃眷喉中梗梗有肉如炙糝五十八

陳茂之勞倦色慾傷寒六十

吳小峰酒積作痛六十二

王敬泉胸膈飽悶頭暈作吐六十四

大司馬令媳產後暈厥發狂有發明六十六

包繡可先生令眷孕而發瘧六十八

方東埜兩脇痛三十六

一婦心痛唇紅虫症三十八

倪少南右頰車浮腫疼痛四十

高仰山內痔血裏急後重四十一

張五橋先生令政痰喘咳嗽四十四

王祖泉乃眷遍身痛四十五

費一吾令政孕子淋四十七

八娘子頭痛咳嗽痰多有血四十九

李坦渠令子室咳嗽心痛腰疼五十一

張分守腰膝痠痛五十二

徐老夫人胸膈痞悶五十五

陳仰山內人小產一月而血大下五十七

張溪亭令媳夢亡過祖母打其背五十九

陳五山胃脘痛六十一

沈大叅痰飲痞滿六十三

張二官傷寒六十五

孝廉臧若泉瘧後作痢六十七

吳比部公子病眼有發明六十九

丘太守令姪筋痠有發明七十

韓僉憲令媳怒後夜臥不安七十二

丁春元令郎瘧母七十四

吳來星先生楊梅風毒有發明七十六

凌繹翁痰火吐紅喘嗽七十八

周采石濕熱生痰痞悶八十

閔蜃樓虛損咳嗽令脊痛風奇疾有發明八十二

金寄閒令堂痢而胸膈膨脹八十三

徐中宇之婦汗出如雨昏又憤又胸膈要人足喘八十四

金達泉令政孕三月而痢赤白八十五

金達泉瘧痢交作八十七

淮陰胡少泉令郎夢遺令愛發熱咳嗽又友人奇疾八十九

吳氏婦隱疾有發明九十

王祖泉臟毒下血九十二

一書辦下消七十一

韓老夫人夜來臍腹痛甚七十三

孫令君令媳產後譫語發熱洩瀉有發明七十五

潘見所老先生小盛价疳積有發明七十七

周鳳亭濕熱壅滯發熱煩躁有發明七十九

又令孫女龜背八十一

一

金元岩赤白痢八十六

一

金寄閒少陽陽明合病為瘧八十八

一

一

染匠之婦腸癰九十一

一

李應泉醫案卷之二

梁九龍醫案卷之二

蔡烈如醫案卷之二

李應泉醫案卷之二

梁九龍醫案卷之二

蔡烈如醫案卷之二

李應泉醫案卷之二

梁九龍醫案卷之二

蔡烈如醫案卷之二

李應泉醫案卷之二

梁九龍醫案卷之二

蔡烈如醫案卷之二

李應泉醫案卷之二

梁烈如醫案卷之二

李應泉醫案卷之二

梁九龍醫案卷之二

蔡烈如醫案卷之二

李應泉醫案卷之二

梁九龍醫案卷之二

蔡烈如醫案卷之二

李應泉醫案卷之二

梁九龍醫案卷之二

蔡烈如醫案卷之二

李應泉醫案卷之二

梁九龍醫案卷之二

門人余煌

三吳治驗

子明泰來全閱梓

王文川令郎原傷飲食又傷於冷菱等物遍身發黃眼如金色夜發熱天明則退腹  
痛手不可近號叫通宵市醫因其黃而曰胡背真矣衆議以草頭藥進予至急止  
之曰向以草藥幾誤其母復欲誤其子乎蓋脾胃喜溫惡寒且此症乃食積釀成  
而黃爲濕熱所致法當健脾用溫暖之劑下之濕熱去而黃自退草頭藥性多寒  
用之是損脾土而益其疾也可用哉即以保和丸一錢入備急丸五分作一次服  
之少頃瀉一次又少頃連下三次積物所下甚多腹痛盡止再與調中丸服一月  
不但一身之黃盡退而步履輕捷如飛其父喜曰神不誤我問其故曰始議進草  
頭藥者十九而孫君獨叱其非余不能決而決於神神允孫君服果有效而吳我  
峯小樓等曰亦孫君之藥神爾設無孫君神雖靈何所顯哉衆拊掌而噓一  
施涇陽先生內人年五十八左脅有痰飲每升至咽間即脹悶不知人事遍身皆脹  
不能臥小水赤診其脉兩寸關洪滑六部皆數予謂此痰火症也痰生熱熱生風  
故每發人事不知爾乃與牛黃清心涼隔丸尙黑虎丹服之夜遂得睡人事亦安  
靜再以二陳湯加滑石竹茹鬱金薄荷黃芩前胡加燈心生姜煎服全安矣二  
屠侍軒尊眷產一日而觸於怒大便洩瀉昏憤不省人事大熱氣促汗多衆醫謂產  
後脉不宜大今脉大而左手且散亂又汗出喘促法在不治予曰固然書云醫而



不起者有矣未有不藥而起者也且不藥而視其死與藥而或可圖生者孰優予試之亟與人參五錢白朮三錢炙甘草一錢五分炮姜二錢肉蓯六分五味子七分煎服其夜遂稍睡予竊喜補而得睡其陰陽和矣次早脉果稍收欬喘促亦緩大便前半夜瀉三次五更啜粥半盂小便通利大有生意也再參以人參阿膠固元氣定喘爲君白朮炮姜補脾爲臣澤蘭葉退產後之熱五味子欬神止汗肉蓯止瀉爲佐甘草和中爲使五帖而安三

屠學恒先生乃眷以產後欠補養而精神疲困脾胃亦弱腹中間作痛作瀉脉兩手皆濡軟無力以六君子湯加藿香砂仁香附蒼朮澤瀉調理而安四

周鑑泉令政病傷寒發熱譫語口渴咳嗽胸膈痛洩瀉嘔吐遍身發斑診之六脉洪滑予曰此少陽陽明合病之症勢亦重矣急以升麻葛根湯加滑石五味子進之服後汗大出下午即退涼而譫語止晚進柴苓湯加五味子滑石其夜瀉止神思始清次日左脉已和右脉亦稍收欬予喜曰可無恙也改用白芍藥爲君陳皮柴胡酒苓五味子牡蠣滑石茯苓澤瀉白朮服四帖而痊可五

大國博臧顧渚先生病兩耳掀痒唇燥舌乾咳嗽吐濃痰脉左稍浮絃右洪滑此胃中痰火流入肺經鬱積久而生熱生風也先以總管丸導其痰又與黑虎丹祛其風熱繼以天花粉薄荷鬱金葛根白藥子甘草黃連連翹蟬退煎服而安六

玉南崗咳嗽氣湧不能伏枕吐痰不已下午微熱胸膈膨脹不知飽餓口乾舌上白胎厚小水短少大便裏急後重間有紫黑血脉右關洪滑左手濡據脉症胃中有

瘀血痰積而肺氣亦虛也法當先補而後瀉以人參白朮白芍藥柴胡黃連陳皮半夏五味子桔梗與三帖後察其肺脉已旺乃與總管丸下之去黑血屑極多諸症悉減再與紅六神丸調理而痊七

張桃津乃政原有小便癃閉之症又小產後三日臍下作疼夜分發熱口渴大便溇日三四度先與補中益氣湯加玄胡索澤蘭葉牡丹皮服之連進三帖大便秘實矣惟小便頻數滴滴不斷一日夜二十餘次夜分尤多精神甚憊脉雖五至不甚充指此血虛有熱而氣亦滯也濕熱在氣分故口中渴血虛故臍下痛法當峻補其陰而淡滲其陽以熟地黃三錢黃柏一錢補陰爲君葶藶去濕熱爲臣瞿麥穗澤瀉淡滲爲佐烏藥調氣甘草爲使服下臍痛全止小便其夜亦不起連進三帖病脫然矣八

陳光祿松巒翁長厚君子也而存心博愛常五更胸膈脹疼三吳名家遍延而治寒熱濕涼藥味備嘗竟無一効禮予診之右寸軟弱左平兩尺亦弱予曰此肺腎二經之不足也補而斂之可無恙矣以補骨脂山茱萸人參各三兩鹿角膠鹿角霜各五兩杜仲巴戟白茯苓車前子各一兩五錢乾山藥二兩鹿角膠酒化爲丸空心淡鹽湯送下又以御米殼去筋膜蜜水炒三兩訶子麵煨去核一兩陳皮一兩半煉蜜爲丸五更枕上白湯送下一錢服一月病不再發翁由是交予極驩也及見予玄珠稿大稱快語曰醫家凡得一方輒自秘以爲高君獨欲公諸人是有意於壽蒼生者亟付剞劂予當助梓因手錄予百餘方製丸散以施而亦無人德我

之望九

溧水令君吳湧瀾公尊夫人每五更倒飽必瀉一次腹常作脹間亦痛脉兩手寸關洪滑兩尺沉伏予曰此腸胃中有食積痰飲也乃與總管丸三錢生姜湯送下大便雖行不甚順利又以神授香連丸和之外用滑石甘草木香枳殼山查陳皮白芍藥酒連調理而安十

李悅齋先生夫人胸脇大腹作疼譫語如狂寅卯辰三時稍輕午後及夜痛甚晝夜不睡飲食不進者十八日究其故原有痰火與頭疼牙疼之疾又因經行三日後頭疼發寒熱醫以瘧治因大惡熱三四人交扇之而兩手浸冷水中口噙水而不嚥鼻有微舛又常自悲自哭目以多哭而腫痛時即壁上亦欲飛去劇則咬人小水直下不固喉梗梗吞藥不下脉則左絃數右關洪滑予曰此熱入血室症也誤服治瘧剛燥之劑而動痰火以致標本交作諸人猶謂熱入血室當夜間譫語如狂如見鬼何至胸脅疼劇咬人也予曰仲景云經水適來適止得疾皆作熱入血室治之治同少陽而以小柴胡湯爲主加涼血活血之藥此古人成法可守也痛極咬人者乃胃虛虫行求食而不得故喉中梗梗然也即以小柴湯加桃仁丹皮而譫語減次日以安虻湯與服而疼隨止飲食進遂駸駸有生意十一

吳仲峰先生邀予診時爲仲秋初二日也六部皆沉微而左尤甚隱又如珠絲之細症則原以腸風去血過服寒涼致傷脾胃自春至秋脾洩不愈日夜十二三行面色黃白帶青兩頤浮腫四肢亦浮小水不能獨利利必與大便並行腸鳴四肢冷

口不渴飲食大減口唇齟肉皆白其爲人也多憂思夫四肢者脾之所主清冷爲陽氣不充兩頤乃腎經部位浮腫益見腎氣之不足也脉沉微與面色黃腫皆屬於濕書云諸濕腫滿皆屬脾土合脉症觀之由脾虛不運積濕而然虛寒明矣病至此勢亦甚危弟形症相符色脉相應又能受補庶幾可生也法當大溫補升提以東垣益胃升陽滲濕湯加減調理人參三錢白朮五錢黃耆二錢茯苓益智仁蒼朮澤瀉各一錢大附子五分炮姜炙甘草升麻防風各五分連服八帖諸症悉減乃囑之曰病雖暫愈宜戒生冷憂思庶服藥有效切勿輕犯犯之非藥石可回也翁曰諾敢不唯命十二

張後溪先生令孫遍身瘡疥浮腫腫自足背起漸腫上大腿今且至腹大便洩瀉發熱不得安寢此風濕之症當令與時違之候治從開鬼門潔淨府二法使清陽升則瀉可止小水利則浮腫可消上下分去其濕之意也蒼朮一錢薏苡仁桑白皮各三錢青蒿防風升麻柴胡各五錢大腹皮五加皮赤茯苓澤瀉各六分八帖全安十三

府佐張五橋先生夫人患喘嗽夜分氣壅不能仰臥體素弱脉右滑大左細弱每咳嗽必連連數十聲痰不易出甚至作吐以東垣人參平肺散加減治之四日而愈人參桑白皮地骨皮青皮茯苓五味子知母滑石麥芽天麻粳米甘草水煎服夜與白丸子十四

方東莖患脊骨痛牽引胸腹皆疼舌上黃胎甚厚脉沉滑而數先與川芎羌活炙甘

草蒼朮姜黃防風藁本枳殼桔梗柴胡服之服後背脊痛減腹仍痛與木香檳榔  
姜黃香附青皮酒連大瓜萆柴胡川芎服之腹痛稍減腰疼甚知其痰積下行欲  
去而不能也即以木香檳榔丸下之連行三四次舌上黃胎始退腹痛全止脉亦  
軟弱改以人參當歸白芍甘草茯苓陳皮白芥子香附柴胡青皮白朮調理而安  
十五

張淨字文學發熱腹疼洩瀉口渴嘔吐不止時師有認寒者有認熱者有認傷食者  
予至診之曰此時疫瀉也以二陳湯倍白朮加青蒿葛根酒芩白芍藥猪苓澤瀉  
滑石一劑而安十六

張一尹近川翁始以內傷外感過服發散消導之劑致胃脘當心而痛六脉皆絃而  
弱此法當補而斂之也白芍藥酒炒五錢炙甘草三錢桂枝一錢半香附一錢大  
棗三枚飴糖一合煎服一帖而瘳十七

閔文川先生肛上生一腫毒月餘膿潰矣但稍動則出鮮血不止大便結燥胸膈飽  
脹飲食不思脉兩寸短弱關絃尺洪滑此氣虛血熱陷於下部法宜補而升提也  
者不然痔漏將作可慮也黃耆二錢歸身地榆槐花枳殼各二錢升麻秦芫各七  
分荆芥穗五分甘草三分服後胸膈寬惟口苦甚前方加酒連連翹各五分而愈  
十八

李古愚先生每食後即大便腹皮稍脹急胸膈飽悶醫與參朮則痞悶愈甚小水清  
而長予脉之左寸濇右寸滑按之如黃豆大且鼓指關尺之脉皆絃小左尺脉迢



迢有神氣據脉乃積痰鬱滯於肺莫能出以致大便之氣不固也法當效丹溪治乃叔用吐吐去上焦痰積而大便自實矣先用苦梗蘿蔔子各三錢白豈仁橘紅山梔仁各一錢川芎五分生姜三片葱三根水煎服之取吐服後半時許惡心吐出清痰心惡之勢雖有乃痰積膠固猶不易出又以蘿蔔子一合搗漿水加蜂蜜與半碗飲之始吐出膠痰二碗餘平日每小水則大便並行吐後小水始能獨利連行三四次而胸腹寬舒初亦以吐爲懼至是豁然稱快大便五日不行始以予言爲不謬也再以二陳湯加白朮旋覆花麥芽調理而全可矣十九

姚惠齋先生夜多洩瀉瀉必三五次甚且十數次小腹時作疼按亦疼口不渴小便長醫半年不愈予診之左寸滑餘五部皆濡弱此陽氣大虛虛中有寒也治當溫補下元兼之升舉人參一錢半黃耆白朮各二錢白芍藥酒炒三錢大附子五分肉桂一錢杜仲補骨脂各一錢半升麻防風各七分姜棗煎服其夜大便減半次早雖瀉俱是白積如生豆汁狀小腹痛止再診之右脉稍起連服四帖而廖翁喜言曰抱病半年藥無虛日今收功於四劑何速哉認病真而投劑確也敢不銘心  
二十

大京兆姚畫老夫人年幾七十右手疼不能上頭醫者皆以痛風治不效益加口渴煩燥請予診之右手脉浮滑左平予謂此濕痰生熱熱生風也治宜化痰清熱兼流動經絡可瘳也二陳湯倍加葳靈仙酒芩白姜蚕秦朮四劑而病去如脫廿一  
一僕發熱頭疼口渴腹疼小便赤大便瀉日夜不睡者六日予診之曰據脉汗後浮

數熱尙不減乃疫症也以滑石三錢青蒿葛根白芷片苓各一錢半炙甘草升麻各五分一帖即得睡熱減大半頭痛全除惟小水赤頭暈脚膝無力此病後血虛之故以四物湯加青蒿酒苓薏苡仁服之而安二十二

一僕病與前類而身如火燥頭痛如破大便不瀉小水赤口渴鼻乾不得眠胸膈膨脹腹飢不能食六脉絃而數用竹葉石膏湯加知母枳殼白芷葛根大加青蒿一帖而熱痛減半胸膈亦寬惟口渴小水短濇睡臥不安又與化瘟丹三錢井水化下渴止稍得睡頭暈脚軟喘急與四物湯加青蒿酒苓薏苡仁木瓜服之全安二十二

一僕之病亦與前相似以服丘一齋藥而大吐大瀉熱益增頭痛莫能當煩躁口渴鼻乾嘔吐小水短濇寢食廢者十四日勢甚危急詢前所服藥乃藿香正氣散加砂仁厚朴山查大耗元氣之味且五月火令當權之疫當以甘寒之劑治之何可以辛熱香竄者益其火而枯其津也其勢危矣此皆不知因時達變惟習常膠故以誤人者用急投人參白虎湯加竹茹葛根青蒿升麻一帖而熱除再帖而頭痛止諸症盡去後連治數人多如此類何也此天行之疫故一方見之治多先以甘寒清解之劑投之熱退即以四物湯以補陰血稍加清熱劑而青蒿之功居多此固一時自得之愚用錄之以告同志者使知治法當隨時俗爲變而常套人不可脫也二十四

馬鳳陽文學五月患咳嗽內熱額上多汗惡風脉左絃數右滑數予曰據絃數爲陰

虛滑爲有痰不亟調治恐成虛怯以白芍藥川歸茯苓五味子白朮甘草陳皮貝母天花粉酒苓麥冬知母桑白皮十帖諸症皆瘳七月復瘧間日一發寒熱相半寒熱亦俱極渴甚上身汗多以石膏五錢人參黃耆白芍藥麥冬知母各二錢柴胡三錢桂枝甘草陳皮貝母各一錢竹葉三十片一帖而愈二十五

倪二南先生內人小水不禁一日二十餘起脉右寸洪而有力左寸虛右尺沉微此心腎不交之症也以當歸遠志丹參牡丹皮桑螵蛸人參山茱萸益智仁黃柏知母爲丸服之五日而安後凡遇辛苦則發以此服之立效二十六

柱史嚴印老長媳少司空沈鏡老女也患腹痛有小塊轟轟然腹覺冷甚兩寸關皆滑數兩尺皆沉微此脾氣弱而飲食不消又當秋令濕淫之候不利亦瀉宜預防與白朮蒼朮茯苓甘草白荳仁木香半夏陳皮澤瀉煎服其夜果瀉一度次早又瀉一度小腹仍疼不少減且裏急後重蓋其稟賦素虛當補中兼消兼利自芍藥三錢桂心一兩甘草人參茯苓澤瀉陳皮白朮各八分升麻葛根各六分服後脉皆軟弱不滑蘊塊亦消改以人參黃耆白朮白芍藥各二錢炙甘草陳皮澤瀉葛根柴胡茯苓各一錢調理而痊二十七

新市陳鹿塘先生原有腸風臟毒之症大便燥結數日不能一行痛苦殊甚此胃寒腸熱之症其脉兩寸皆數兩關皆絃而無力兩尺洪滑而左尤甚診畢渠告予曰病數年百醫不效望生難矣聞公治多奇中冀一奇而生之實再造之恩也予憐其苦而俛想久之因思李東垣有云大腸喜清而惡熱脾胃喜溫而惡寒以胃屬

土而大腸屬金也今治腸胃相兼之疾必寒非淒淒熱非灼灼始可乃詳酌一方專以腸風臟毒之藥爲君主外以養血之劑裹之使不傷胃氣蓋藥先入胃而後傳入大腸入胃時裹藥未化及入大腸則裹藥化而君藥始見庶幾兩不相妨亦假道滅虢之策也因以大黃酒浸九蒸九晒者二兩槐花三兩木耳二兩郁李仁皂角子象牙屑條芩各一兩血餘灰升麻荊芥穗各五錢爲末煉蜜爲丸赤豆大外以四物湯加蒲黃各一兩爲衣米湯送下空心及下午各服二錢服此果然血止而大便不燥飲食日加鹿塘大喜曰古稱用藥如用兵奇正相生鮮有不克敵者其公之謂乎二十八

張道南先生內人以飲食忤於氣因腹痛不飲食五日矣逆予診之兩寸關絃尺滑予曰此上焦氣虛下有鬱滯也以姜黃青皮爲君山查檳榔當歸杏仁烏藥枳殼爲臣柴胡木香爲佐吳茱萸爲使服後氣稍順然後用葱二斤煎湯浴洗腰腹卽將熟葱擦摩腰腹使氣通透洗畢卽安臥少頃其夜大便通先下皆黑硬結塊後皆水此積滯行而正氣虛也以建中湯加山查茯苓澤瀉柴胡香附姜連調攝之而痊二十九

張道南先生尊堂老夫人以勞倦致早晨鬲上有痰痞而惡心每食熱物目中卽出泪脉右寸關皆滑左寸短弱此心血不足而肺胃有痰也以六君子湯加麥芽白豆仁旋覆花治之而愈三十

馬迪庵先生內人原以飲食過傷又爲風寒外襲以內傷外感治之後復至五更發

熱唇燥胸中衝跳不已手足皆冷脉兩寸俱滑數予謂此奇痰症也以小陷胸湯加白芍藥蘿蔔子前胡酒芩二帖次早大便行下虵虫八條胸中即不衝跳但覺力怯再診之兩寸減半尺脉稍起以二陳湯加白朮白芍藥酒芩調理後四帖加當歸而全愈三十一

大宗伯董潯老夫人常眩暈手指及肢節作脹脉右寸軟弱關滑左脉絃長直上魚際兩尺皆弱此亢而不下之脉難經所謂木行乘金之候也總由未生育而肝經之血未破爾內經云諸風掉眩皆屬肝木兼有痰火治當養金二木培土化痰以白朮半夏天麻湯正與此對服兩帖而眩暈平再與六君子湯加天麻白姜蚕以治其暈加白芍藥以瀉肝麥門冬人參以補肺金麥芽枳實神麴蒼朮以健脾使宿痰去而新痰不生少用黃栢二分爲使引熱下行令不再發三十二

張裕齋惡寒痰多作呃胸膈不寬兩寸俱短弱關洪大尺濇此上焦氣虛中焦有痰下元不實也法當清中補下不然後將有中風之患二陳湯加白豈仁香附藿香以開胃氣白芥子蘿蔔子杏仁以降痰而潤大便兩帖諸症悉去乃錄八味腎氣丸方與之令自調理三十三

大柱史嚴印臺夫人年近六十已孀居十年餘以孀居而食長素其婿張懷赤善予語曰外母近鼻塞大便瀉胸膈不暢醫者下之益甚予曰王海藏有云雜病酒積下之早必成痞滿所當慎也用拉予診之兩寸沉弱關絃大兩尺亦弱予曰此陽氣甚弱脾氣大虛不當下而誤下之故鼻作塞而胸痞悶也用蒼朮川芎桂枝白



芷防風桔梗以疎風而升陽氣白荳仁蘿蔔子寬胸利膈麥芽以助脾氣服後鼻不塞而胸猶痞復用東垣木香化滯湯加吳茱萸乾姜而安乃囑之曰病雖漸愈第陽氣虛脾氣弱不宜久食素恐中氣不充防作中滿謹識之謹識之三十四

王谷泉大便作瀉上身熱耳中壅塞頭眩暈胸膈不寬口渴痰多咳嗽六脉俱濡弱汗大出此正氣大虛或由尅伐太過所致當以補養爲先人參白朮白芍藥酒炒各四錢柴胡石菖蒲陳皮各一錢炙甘草五分澤瀉茯苓各一錢兩服而神清膈寬脾健惟汗不斂眩暈未除再與人參白朮黃耆酒炒白芍藥各二錢炙甘草五分大附子五分桂枝三分澤瀉一錢而愈三十五

方東埜兩脅痛上壅至胸發熱飲食不進脉左手沉而絃數乃積氣也右手滑痰飲也關脉濡弱脾氣不充也據症或觸於怒故痛之暴耳治當先去積熱消痰氣然後用補瓜蒌仁六錢枳殼姜連半夏各一錢半白芥子一錢牡蠣二錢炙甘草五分柴胡一錢五分二帖諸症盡去飲食進矣然恐其復發也與當歸龍會丸使行之以刈其根服下果行二次三十六

一婦人懷妊七月內熱咳嗽胸膈飽悶以條芩二錢瓜蒌仁白芍藥紫苑貝母桑白皮各一錢甘草三分枳殼紫蘇梗知母陳皮各七分二帖而愈三十七

一婦人心痛唇紅痛則大發熱頭疼少頃出汗脉大小不一予曰此虫痛之症痛吐白沫可徵也檳榔川椒各二錢杏仁一錢五分石菖蒲一錢烏梅七個炮姜草豆仁陳皮各五分山梔仁一錢一進而痛減半再進而痛全除三十八

倪二南內人小產後小腹痛夜分作熱作暈予曰此氣血虛而惡露未盡也川芎一錢半當歸三錢澤蘭益母草香附丹參各一錢人參七分荊芥穗五分山查桂皮各一錢一帖而小腹痛止再帖而熱暈悉除三十九

倪少南右頰車浮腫而疼直衝太陽大發寒熱兩手寸關俱洪大有力此陽明經風熱交扇所致以軟石膏三錢白芷升麻各一錢葛根二錢生熟甘草一錢薄荷山梔子牡丹皮連翹各七分天花粉貫衆各一錢半兩帖腫痛全消四十

倪少南內人經行如崩勢不可遏頭暈眼花脉右寸極軟弱左近駛此氣虛血熱之候由氣虛而血不固也仲景云血脫益氣特用人參黃耆各三錢白朮二錢粉草五分荊芥穗蒲黃側柏葉姜炭各一錢三帖全瘳四十一

高仰山內人痔血裏急後重飲食入腹大便即行晝夜行五六度五更咳嗽喉中痰响肌肉脫口作渴由服痔科涼血之藥過多致脾虛不能統血也脉六部皆軟弱無力以四君子湯加荊芥穗秦艽陳皮炮姜四帖而飲食進血全止嗽定而睡寧後減炮姜倍加何首烏又四帖而數年不發矣四十二

姚娘子小腹疼飲食及藥入腹皆疼疼來遍身無力此由血崩而致宜急治之人參黃耆各二錢白朮一錢茯苓陳皮各八分白芍藥貫衆各一錢姜炭荊芥穗蓮蓬殼燒炭各三分煎服而安四十三

張五橋先生令政鄭都諫春實公令姊也痰喘不能伏枕且咳嗽甚則吐痰涎碗餘乃止以旋覆花湯爲主治之旋覆花紫蘇子各一錢半夏一錢五分厚朴桂皮粉

草各三分茯苓陳皮桑白皮葶藶子各八分姜三片水煎服臨臥以養正丹二十粒白湯送下兩帖痰嗽喘各減十之七乃去葶藶子加白芥子蘿蔔子二帖而痊  
四十四

徐文學三泉先生令郎每下午發熱直至天明夜熱更甚右脇脹痛咳嗽弔疼坐臥俱疼醫以瘧治罔效延及二十餘日熱不能退後醫謂爲虛熱投以參朮爲主痛益增逆予診之左絃大右滑大搏指予曰內經云左右者陰陽之道路據脉肝胆之火爲痰所疑必勉強作文過思不決木火之性不得通達鬱而爲疼夜甚者肝邪實也初治只當通調肝氣一劑可瘳誤以爲瘧燥動其火補以參朮閉塞其氣書云體若燔炭汗出而散今汗不出舌上之胎已沉香色熱之極矣設不急治立見凶危乃以仲景小陷胸湯爲主大瓜蒌一兩黃連三錢半夏麩二錢前胡青皮各一錢水煎飲之夜服當歸龍會丸微下之諸公猶爭之曰病久而食不進精神狼狽若此寧可下乎予曰經云肝常有餘且脉亦爲有餘故有餘者瀉之前時誤認爲虛投補左矣豈容再誤哉服後夜半痛止熱退兩帖全安四十五

王祖泉乃眷朝飯後稍寒惡風發熱遍身疼痛汗大出不止口中熱腹中不知餓小水短六脉皆澹以白芍藥五錢白朮二錢桂皮黃芩各一錢甘草八分二帖而汗止寒熱除減去白朮加當歸而遍身痛止四十六

費少垣乃眷妊已九月痰多喘嗽胎氣上逆眼撐不起兩太陽微疼予曰此子懸症彙痰火也以大紫蘇飲爲主纔服一帖逆即不逆胸膈頓寬惟喘嗽不止與七製

化痰丸而安四十七

費一吾先生令政姪已四月夜不能睡小便淋痛痰嗽內熱脉右關滑左寸微弱兩手皆數與橘紅貝母片芩黃連茯苓澤瀉枳殼蘇梗前胡水煎服之其夜即能安寢次日再以四君子湯加當歸香附貝母陳皮條芩紫蘇梗前胡調理足月而產一子四十八

令弟媳六娘子遍身痛發熱汗大出昏昏如醉臥不能起兩寸脉短弱兩手皆數而無力此勞倦之餘故汗大走也黃耆三錢白芍四錢粉草一錢五分桂皮八分當歸一錢石斛二錢一帖熱除痛汗皆止惟倦而不能起仍以前方加人參陳皮兩帖而痊四十九

又八娘子頭痛咳嗽痰多有血夜分發熱喉中常作血腥每經水行必腹中先痛二日用香附牡丹皮滑石甘草桃仁川芎當歸柴胡白芍山梔子茅根八帖而瘳五

姚弁山老先生內人自上年十月左足不能履地至十二月產後忽好三日復不能動時常胸脇作痛素多痰火而治者年以四物湯天麥門冬爲主間服獨參湯服將爛年而病如故予診之兩寸脉俱洪滑而數夜分發熱此係濕痰凝滯補塞太重故遷延不脫乃以二陳湯加蒼朮黃栢歲靈仙五加皮生地黃白芥子白芍藥當歸兩帖胸脇痛止熱除再加薏以仁八帖而足能舉步矣五十一

李坦渠老先生令子室十月發寒熱起一日一發咳嗽心痛腰亦痛至次年正月十

七日始間日一發肌肉大瘦喉疼汗出如雨白帶如注飲食減少百試而汗不止延予爲診其脉右手軟弱左手散亂此汗多而脉不斂病勢至此危之甚矣書云火熱似瘧此病之謂歟以黃耆二錢白芍一錢五分粉草阿膠各一錢鱉甲三錢桂枝五分烏梅一個水煎服其夜汗止次早診之左脉已斂神氣亦回前方加何首烏石斛牡蠣其日寒熱亦不發飲食稍加駸駸然有幽谷回春之象五十二

太學周衡宇先生吳江瀾溪人大冢宰白川公之令孫也近來咯血色紫胃中痰火素盛壅於胸膈作痞作痞痰與瘀血挾而爲熱脉左寸洪大右寸關皆滑兩手盡數此有餘之候總管丸四錢再以滑石桃仁各三錢山查二錢枳殼梔子貝母紅花丹皮各一錢茅根五錢水煎服之次日大便秘行三次痰積極多內帶瘀血改以山梔子紫苑丹皮各一錢滑石三錢桃仁一錢五分小薊三錢茅根五錢水煎加童便一酒盃三帖全安五十三

大叅張公分守杭嘉湖道因喪夫人衙中亡者八口中惶又因凌繹翁交厚而禮予爲診左寸脉短關絃右關滑兩尺亦絃據脉心血不足中焦有痰流於下部凝於經絡以故腰膝痠疼居常背心作脹頭多眩暈夜睡多汗午時諸醫悉投風劑非所宜也予以陳皮白芍藥木瓜牛膝五加皮以仁黃栢酒芩甘草生地當歸葳靈仙調理十劑諸症悉愈五十四

大都諫鄭春寔老先生爲春元時頭痛內熱入夜尤甚汗出如流通宵不止小水短赤舌上黃胎右脅脹疼先與桂枝白虎湯一帖解其內熱斂去浮汗再與白芥子



一錢瓜蒌仁四錢枳實姜黃黃連各八分水煎服外與當歸龍會丸一錢五分下之而脅痛安五十五

大叅徐天目老夫人胸膈痞悶不思飲食咳嗽多痰或時惡心上焦頭目俱不清利向來長素兩寸關滑大如豈兩尺沉微痰火症也二陳湯加酒芩薄荷前胡枳殼蒼朮香附鬱金川芎調理而安五十六

張麗川咳嗽多痰面青潮熱肌瘦性燥而多自用以數考不利悒悒成疾又新婚之後飲食不節脉之右關滑大餘部皆無神氣且糞門已發癭瘡潰流膿血予曰此陽病極而下也法在不治果不逾月而亡五十七

陳仰山先生內人小產後二月而血大下白沫如注五更洩瀉面虛浮下午身熱口渴面色青黃脉右手豁大近芤左濡弱據此大虛之候血海尙有瘀血不盡以致新血不得歸源稍動氣即下如崩蓋脾乃統血之經虛則不能約束且面浮食少脾虛劇矣急宜溫補勢或可爲人參白朮各二錢姜炭粉草各五分茯苓六分香附八分丹參炒過一錢水煎服四帖而瀉止再以人參白朮各二錢茯苓丹參黃耆蒲黃各一錢姜炭澤蘭葉粉草各五分調理全愈五十八

張溪亭乃眷喉中梗梗有肉如炙嚙吞之不下吐之不出鼻塞頭暈耳常啾啾不安汗出如雨心驚胆怯不敢出門稍見風即遍身疼小腹時疼小水淋漓而疼脉兩寸皆短兩關滑大右關尤搏指此梅核氣症也以半夏四錢厚朴一錢紫蘇葉一錢五分茯苓一錢三分姜三片水煎食後服用每用此湯調理多效五十九

溪亭子室姪已七月夢見亡過祖母揮拳背打一下驚醒即覺胎動不安血已下大  
小便皆急腰與小腹脹疼者五日此亦事之奇也迺予爲治兩寸脉俱短弱此上  
焦元氣大虛當驟補之人參阿膠黃耆白朮各二錢當歸白芍條芩杜仲各一錢  
砂仁香附各五分苧根嫩皮三錢葱白六錢一劑而血止兩劑諸症悉除而神漸  
安四帖後減去苧根葱白調理旬日足月而產一女六十

陳茂之勞倦之後勉強色慾精竭而血繼至續感風寒發熱頭痛胸膈飽悶始從太  
陽而傳至少陽胸脇痛而耳聾嘔逆口苦咳嗽六脉俱絃數此少陽症也以小柴  
胡湯加枳殼桔梗竹茹而嘔逆止熱退因進粥早復熱口渴小水不利大便一日  
夜六七次所行皆清水日晡熱甚舌上黃胎昏沉振顫此食復之候書云渴而小  
便不利者當先利其小便以猪苓湯爲主猪苓澤瀉各二錢滑石三錢赤茯苓一  
錢柴胡八分升麻木通各五分連進二帖小便利而大便實但熱不退以六神通  
解散一帖其夜熱仍不退次早診之左脉不絃數矣兩寸脉虛以故服藥無汗口  
渴漱水而不欲嚥咽熱此邪傳陽明經不急涼血必作鼻衄病勢至此可謂極惡  
矣投黃芩芍藥湯合生脉散以止嗽渴用葛根湯以解肌熱白芍藥三錢葛根升  
麻黃芩各一錢人參一錢五分麥冬滑石各三錢甘草五味子各五分烏梅一枚  
急煎二帖飲之日中大便下燥糞十數枚始得微汗就得睡矣晚進粥一盃夜臥  
向安六十一

陳五山胃脘疼醫作勞倦治不効又醫作寒氣治而用剛燥痛轉極又醫以巴豆丸

下之大瀉皆水亦無積滯之物痛雖稍減然面有虛浮胸痞足腫又張醫以人參白朮各二錢大補脾胃則痰嗽氣逆上高熱甚喉嚨乾燥右脇不能貼席大便一日二三日行因向被巴豆丸瀉起迨今七日猶瀉不止飲食大減延予爲治診兩寸濡弱兩關滑兩尺洪大予曰據症原起於鬱火亂投湯劑大推大搬以致加重若平平治之自當尋愈二陳湯加姜連枳實姜黃桔梗蘿蔔子前胡一帖而熱嗽除右脇亦可貼席再劑而飲食進大便實其晚又爲怒氣所加痰嗽脇痛如舊且多煩躁改用橘紅貝母瓜蒌茯苓山梔子前胡青皮甘草桑白皮蘿蔔子水煎飲之而平六十二

吳小峰年五十未有子素有酒積作疼晌午即瀉所下多稠粘之物腹痛之疾年已久矣治當清潔中焦分濕熱兼養脾法用白滑石三兩粉草肉蓯各五錢白芍藥酒炒一兩五錢木香三錢紅麴四錢神麴糊爲丸每早晚白湯送下二錢服未竟而疾除始舉一子六十三

沈大叅玉陽老先生中焦有食積痰飲而作痞滯以故大便了而不了間或作脹予脉之兩寸短弱關滑兩尺沉滑有力予曰脾胃經有濕痰蘊而爲熱但清其中宮使清陽升濁陰降而氣血自旺此不補之補也以二陳湯加枳實酒連酒芩滑石姜黃木香乾葛山查兩劑而愈六十四

王敬泉頭暈且痛起則倒仆胸膈脹悶如繩束縛嘔吐而食飲皆不得入六脉俱瀉此痰飲挾木火之勢而作暈也先以濟生竹茹湯而吐不止且煩躁發餽發熱再

與蘆根湯連進二碗氣餽稍定再以吳茱萸一兩爲末以雞子清調塗兩足心引  
火下行外用二陳湯加姜汁炒黃芩黃連旋覆花枇杷葉丁香白荳仁檳榔柴胡  
水煎服之服後熱退大便亦行頭暈嘔吐皆止惟胃脘有一塊作痛仍與前藥兩  
劑而塊亦消六十五

張二官發熱頭痛口渴大便秘結三日未行脉洪大此陽明少陽二經之症用大柴  
胡湯行三五次所下者皆黑糞夜出臭汗次日清爽惟額上仍熱用白虎湯加葛  
根天花粉因食粥太早復發熱咳嗽口渴殊甚且惡心用小柴胡加枳實山梔子  
麥芽次日渴不可當改以白虎湯加麥門冬天花粉外與辰砂益元散以井水調  
下五錢熱始退渴始定不虞夜睡失蓋復受寒邪天明又大發熱不知人事急用  
小柴胡湯加升麻葛根前胡薄荷進之而汗出熱退神思大瘳四肢皆冷語言懶  
餘且咳嗽以生脉散加石斛白合大棗白芍藥服後咳嗽尋止精神日加飲食進  
而向安矣六十六

大司馬潘印川第三令子室尙書蔣公孫女也年二十五體素弱語言端謹因難產  
傷力繼以生女拂意後又女死悲戚即時暈厥醒而神思昧手足痠痲目作上  
視予更後始至因痲痲不能診脉細詢之自女落地惡露絕無比有女醫在旁乃  
昔所親信者時與人參大嚼及獨參湯并粥亂進參與粥皆壅塞隔上不下以故  
神昏痲痲不已也予教以手於喉中探而吐之喜其隨手吐出痰飲粥藥盈盆痲  
痲方定乃與川芎山查澤蘭葉陳皮半夏茯苓香附進之稍得睡予亦出中堂就

寢不虞女醫又私與補藥二帖子丑時陡然狂亂如降神之狀口中亂語云我是觀音大士降壇所言皆儒雅官話問答如流聲甚壯厲殊無產後不足之態生平不諳漢聲至是出語如生成者人皆異之目爲神附禳禱百般予獨諍之語諸左右曰此惡露不盡乃蓄血如見鬼之症非真有神佛相附也徐以正言叱之即緘默繼以清魂散加滑石童便與之至天明小水乃行狂亂皆定迨予出房少頃詎知女醫意欲要功又不知與何藥服之少刻狂亂如前再與川芎一錢五分當歸四錢澤蘭葉益母草各一錢臨服加童便連飲二帖不效予逆思之胸中必有餘痰作滯前劑中無佐使之品故藥力不行也即用前劑大加山查與之惡露稍行神思即靜嗣後稍睡少時手足微動或自以手掌其面或自以手搥其胸昏亂不息診其脉近虛早間面紅而光申酉時面色白此血行火退故脉虛而當補矣與人參川芎澤蘭葉各一錢當歸山查各二錢茯苓陳皮各八分捲荷葉一片煎熟調琥珀末子五分服下半時許噁氣二聲予喜曰此清陽升而濁陰降矣自茲安靜夜中惡露微行大便亦利乃索粥飲問其昨日漢聲何來答曰不知也諸君始信蓄血如見鬼之言爲不誣昔秦越人有言曰病有六不治信巫不信醫一不治也古稱用藥如用兵以郭子儀之英明而以魚朝恩監之便不成功予固非郭令公之儔彼女醫之誤則又有過於魚朝恩矣噫甯不慎哉六十七

孝廉臧茗泉老先生脉左絃數右寸弱關大重則滑右尺微原以瘧後復傷飲食大便瀉而變痢一日夜雖只五六行皆積滯無糞腹疼後重難安午未後發熱至天



明始退此夏傷於暑而秋爲瘧痢也其熱仍瘧之餘邪當先解散然後以補劑投之則大便自愈矣與神授香連丸一服服訖腹中腸鳴須臾大便秘行且較前更多方有糞下改以白芍藥四錢澤瀉黃連各一錢滑石二錢粉草桂皮木香各四分山查七分兩日後乃與補中益氣湯加木香黃連白芍藥調理半月潮熱大便皆愈六十八

包繼可先生令眷孕三月而瘧疾發先寒後熱胸膈大脹疼口渴湯水入即吐譫語無汗胎氣上衝而成子懸脉皆絃大以川芎柴胡黃芩知母甘草橘紅紫蘇枳殼砂仁水煎服之吐止痛除六十九

一張氏婦年纔二十一其夫延予診之左寸關短弱尺滑右寸亦滑關濡弱尺沉微診畢問予曰脉何如予曰心神脾志皆大不足肺經有痰夫曰不然乃有身也予曰左寸短弱如此安得有孕夫曰已七十日矣予俛思久之問渠曰曾經孕育否夫曰已經二次今乃三也予問二產皆足月否男耶女也夫曰實不敢諱始產僅九個月手足面目完全而水火不分蠻肉一片生下亦無啼聲抱起已身冷矣細檢之乃知其無水火也次亦九個月產下又無啼聲看時口中無舌二胎之異不知何故聞先生能細心察人病特祈審之予方悟前二胎之不完者由心脾二經不足所致也今左寸右關之脉可見矣迺爲籌思一方專以補心血爲主令其多服以百帖爲率酸棗仁遠志茯神各一錢白朮二錢白芍藥當歸枸杞子各一錢五分甘草五分生地黃八分芫芎二分龍眼肉五枚水煎服足月而產一子次年

又有身不以前事爲意至九個月產下形體俱具外有脂膜一片包其面耳目鼻不見但不能去此脂膜產下即歿因思上平之子爲藥之力也因予久不至苦其家以予方粘於壁間一覺有身即照方服之後生二子一女里中以此方爲補天手云六十九

癸巳仲夏吳比部鳳麓父母以次君絃臺先生眼目紅痛恐學道按臨速於取效乃聽眼科醫寒涼而治兩越月無驗又眼科視之曰目疾不宜多用寒涼恐冰其血以人參五錢枸杞子一兩悉溫補之劑凡人參枸杞子五六斤矣目腫如桃絕不能開又專科語之曰紅腫而痛明是熱症誤服溫補反助其熱寧不益腫顧其勢即百寒涼亦不易瘳捷徑無如用下此釜底抽薪法也絃臺惟求速效一聽下之用大黃芒硝枳殼作大劑下五六次而飲食日減惡心畏風則不能出房門矣又專門謂前劑欠當大瀉之後正合補也又聽補之一補而目腫如舊又有眼師云目疾熱症多寒症少只當滋補腎水水升則火日降火降而目疾斯愈矣用是以滋陰降火之劑爲恃纔數服而精滑不禁一夜夢遺一二次神氣大脫投補則目腫痛用降則精元滑脫屢試屢如是諸醫無策悉謝而退乃修書命使自淮陰之海陽懇祝令君紹介徵予爲治予始以遠爲懼祝再四爲渠言予亦素爲渠重義不得以遠爲辭乃介行李嚮往至即診之左寸脉甚短右寸大而無力左關絃弱右滑兩尺亦滑予見其坐在幔中畧不敢見風問其日食幾何答曰三次計二碗許葷腥絕不能用予曰夜臥安否答曰邇來甚苦於睡纔合目即夢魘可畏或

被虎蛇交咬或有鬼來勾攝或落橋墜井或與人爭鬪而負猛然驚悟冷汗淋漓四肢癱軟不能動憚少頃乃定今幸公不遠千里而臨足徵素雅予曰足下始無大恙只緣大推大搬以致狼狽若是彼專科者不足恃也經謂五臟精華皆上注於目今專科局局然守其死法安知五臟盈虛陰陽消長隨時出入哉以愚管見但平平治之易與耳據足下之脉心神脾志互相不足肝胆之火鬱而不散致生目痺今爲補養心脾壯其神志則飲食日加寢臥安穩而精元有守神水盈溢何目痺之不愈哉絃臺曰善惟先生命劑乃以歸脾湯減去黃耆木香加丹參而補心脾以大安丸專助脾胃而磨穀食俾新痰不生則氣血可繼日而旺矣後五日而飲食加十日而夢魘少尋能出戶不畏風日半月而肌肉生目可觀奕津津然而有萬全之兆不虞專門張氏子復至以白眼藥日頻點之一日凡七八次從此復不能開臉肉風粟生滿適予有南都之行卒爲所誤後幸有李少塘打去風粟眼始能開李雖手法精熟然於軒岐闢奧尙亦未窺籥籬予後自南都至見左目雖愈右目終成內障予故曰彼專科者不足恃也豈虛語哉七十

丘太守鎮山翁令姪淮陰人也丁年患兩手筋攣指掉不能屈伸臂肉瘦削體瘠面白寢食大減市中諸友調治無驗乃任京口諸名家療之半年肉更消色更瘁聞予在吳比部衙中敦予爲治診其脉六部俱絃重按稍駛診竟扣其受病之源太守公曰自上年冬底偶發寒熱筋骨疼痛迨於仲春寒熱雖退而筋骨之疼不減服藥無虛日甚之日三四進肉漸消去指掉不隨似有加於往昔醫之來者一曰

風二曰風三四五六皆曰風即十數輩又莫不皆曰風者竭技盡方卒無一應奄奄床第絕不知爲何病予對公曰此筋痿症也乃少年不謹慾而受風濕邪氣乘虛而入醫者不察天時不分六經槩而汗之仲景治風濕之法但使微汗津津則風濕盡去若汗大出則風去而濕存由是血氣俱虛經云陽氣者精則養神柔則養筋虛則筋無所養漸成痿弱乃不足之疾故陳無擇朱丹溪劉宗厚皆謂諸痿切不可作風治誤則成痼疾公聞言愕然曰服風藥幾二百劑矣顧今已痼柰之何予對曰令姪青年猶可圖也公曰用何法予曰法當大補氣血經云氣主煦之血主濡之氣血旺則筋柔而軟由是乃可以束骨而利機關也抑何掉之有哉病者聞言大喜曰聆先生詳病之源治法之略雖未服藥已覺沉疴去體矣即請劑予以五加皮薏以仁紅花人參鹿角膠龜板虎骨當歸丹參地黃骨碎補蒼耳子之類服兩月肌肉漸生飲食大進兩手指掉亦平復七十一

一書辦年過五十糟酒縱慾無憚忽患下消之症一日夜小便二十餘度清白而長味且甜少頃凝結如脂色有油光治半年不驗腰膝已下皆軟弱載身不起飲食減半神色大瘁脉之六部大而無力書云脉至而從按之不鼓諸陽皆然法當溫補下焦以熟地黃六兩爲君鹿角霜山茱萸各四兩桑螵蛸鹿角膠人參白茯苓枸杞子遠志兔絲子懷山藥各三兩爲臣益智仁一兩爲佐大附子桂心各七錢爲使煉蜜爲丸梧桐子大每早晚淡鹽湯送下七八十丸不終劑而愈或曰凡云消者皆熱症也始公具方人多議之今果以溫補成功此何故哉予曰病由下元

不足無氣升騰於上故渴而多飲以飲多小便亦多也今大補下元使陽氣充盛  
薰蒸於上口自不乾譬之釜蓋釜雖有水若底下無火則水氣不得上升釜蓋乾  
而不潤必釜底有火則釜中水氣升騰薰蒸於上蓋纔濕潤不乾也予已詳著醫  
旨緒餘中茲不多贅七十二

僉憲韓約齋老先生令子室每怒動則夜臥不安如見鬼魅小水淋瀝今又大便秘  
結腹中疼痛腰跨脹墜如生產狀坐臥不安因痛而脉多不應指此肝經鬱火所  
致法當通利以杏仁桃仁各三錢栢樹根皮山梔仁青皮各一錢檳榔五分枳殼  
八分水煎服之少頃大便通痛脹隨減七十三

僉憲韓約齋老先生夫人向來夜分臍腹疼極甚必用炒鹽熨之兩時久乃止次日  
必頭痛兩太陽如箍遍身亦疼此上盛下虛症也先用柴胡川芎粉草酒連薄荷  
天麻橘紅茯苓半夏蔓荊子水煎服數帖頭痛全止惟咳嗽胸前畧痛兩寸脉浮  
滑兩尺弱再用鹿角霜鹿角膠補骨脂遠志枸杞子金鈴子香附子煉蜜爲丸梧  
桐子大每空心及下午食前淡鹽湯送下七十九丸而瘳七十四

孝廉丁震瀾丈令郎纔二歲瘡母上壅咳嗽每午後發熱至子丑時乃退終日啼哭  
不止鵝口白屑神氣大弱痘後遍身瘡疥未愈多方治之不效有灸之者有割之  
者有以膏藥貼之者種種施之全然不應予曰乳下嬰孩臟腑薄脆不可亂攻亂  
補參耆足以增其嗽灸剝適以驚其神安能取效予教以白朮鱉甲各一錢五分  
青蒿麥芽陳皮各八分烏梅一枚貝母知母各六分甘草三分八帖全愈七十五



武進令君孫康字公子室臧位字丈女也年十六初產女艱苦二日偶感風邪繼食  
麵餅時師不察竟以參朮投之即大熱譫語口渴汗出如洗氣喘洩瀉瀉皆黃水  
無糞一日夜不計遍數小水短少飲食不進症甚危惡時當六月初旬女科見熱  
除乃投黃芩芍藥黃連寒涼之劑諸症更甚又以參朮大劑肉果乾姜等止瀉  
一口計用人參二兩四錢瀉益頻熱益劇喘汗轉加譫語不徹口醫各縛予辭謝  
曰書云汗出如油喘而不休死症也又汗出而熱不退瀉而熱不止且譫語神昏  
產後而脉洪大法皆犯逆無生路矣惟附子理中湯庶徼倖於萬一適予爲顧太  
守肖溪公延至卽過爲一診六脉亂而無緒七八至獨右關堅硬躊躇久之因思  
暑月汗出乃常事但風邪麵食瘀血皆未消熔補劑太驟書云蓄血如見鬼治當  
消瘀血麵食解其暑氣猶可圖生勿遽棄也有減玉宇者位宇堂兄也醫有雅致  
深以予言爲然而速予措劑予曰劑憑症發難拘常套不常之症須用不常之藥  
乃用益元散六錢解暑氣清熱爲君仲景云渴而小便不利者當先利其小便况  
水瀉尤當用之爲君也以糖毬子三錢爲臣紅麴澤蘭葉各一各五分消瘀血安  
魂爲佐香附一錢五分爲裨佐橘紅半夏麴茯苓乃統理脾氣爲使京三稜五分  
消前參朮決其壅滯爲先鋒水煎飲之飲下卽稍睡譫語竟止連進二劑其晚大  
便減半次日仍用前劑飲之其夜熱大減大便只二次有黃糞矣惡露畧行黑血  
麴加白扁豆其夜大便一次所下皆黑糞從此熱盡退大便亦實改用四君子湯

加益元散青蒿香附白扁豆酒炒白芍藥炮姜調理而安七十六

吳東星上舍辰州太守公長君也冒暑赴南都試落第歸而怏怏因成瘧自八月中旬延至十月瘧雖止而腰痛白濁日夜咳嗽肌肉大消藥劑亂投認爲風者以羌活防風續斷等發散認爲虛者以六味地黃丸爲補認爲火者以苓連梔子黃柏知母天花粉生地黃瀉其火認爲半虛半實者投以獨活寄生湯認爲寒者以大附子肉桂鹿角膠參朮溫補之痛劇欲死叫撼四鄰予脉之左絃細右滑大俱六至口渴赤予知其昔患楊梅瘡餘毒尙伏經絡適因瘧後氣血不足舊毒感動故痛而暴也以當歸芍藥甘草牛膝鈎藤以仁木通白蘚皮用土茯苓四兩煎湯代水煎前藥服下而痛止咳嗽亦除脉緩其半連服數劑大效精神漸復乃起而督工視事冬至日爲酒興鼓舞縱慾無忌次日腰如束縛足面亦疼左眼赤小水短足底有火從兩胯直冲其上痛不可言予以當歸鈎藤甘草白芍藥牛膝以仁石斛紅花生地黃栢調理三日症已守定畧無進退適大雪寒凍殊甚有女醫爲渠宅所親信者因其大便燥結一日夜服玄明粉一兩五錢大便且不行而腰痛愈猛兩足攣縮氣息奄奄一語而三換氣面青慘渠自覺危急迺喚內人及弟叔囑其後事天明予至診之六脉俱伏痛使然也扣其由乃知服玄明粉所致予曰症雖熱便雖燥但公病不在腸胃而在經絡筋骨間徒瀉腸胃無益也且冬月陽氣閉藏誤瀉則陽氣虧乏來春無發生根本矣今四肢拘縮腰胯痛劇者由日來天令寒極經絡凝澁也寒主收斂法當溫散寒邪之標使痛定然後復治其本庶可

保全乃用桂心杜仲炙甘草蒼朮破故紙五加皮連與二劑痛定而四肢柔和飲食始進予知渠宅素喜速效予適有荆溪之往迺宣言曰足下之疾在經絡顧今天令嚴寒幸寧耐以俟春和爲足下拔去病根渠宅不以予言爲然迺用張雲溪調理予亦讚張之可守蓋張氏藥用養血清熱雖不去病亦不害事迨二月太守公歸迺改用沈春宇沈揣渠必以酒色而致陰虛迺純用滋陰降火之劑以爲旬日可奏功也及調治月餘略無影響予從荆溪歸而謁渠爲三月初旬也渠聞予至即以沈藥呈予且語予公許春和拔除病根此其時也予知太守公方篤信沈隨以溫語慰渠曰沈公名士也可使彼展盡底蘊沈又調理半月以無功而行沈去予再以煨腎散進大瀉五六度四肢冰冷舉家大恐以予瀉之爲非也予曰病從此日減矣夫奚憂後進理脾藥服數帖神氣始轉腰膝柔和可下床舉數步矣方始信而問予曰人皆以補爲治公何得病源之真於三月之前先已預定節節如公語也予曰此楊梅瘡餘毒伏於經絡豈補劑所能去哉予故先爲疎通濕熱然後以補劑收功則無反覆之患後仍以葳靈仙末子二錢入猪腰子內煨熟食之又瀉一二度病根盡拔改用以仁當歸生熟地黃白芍藥牛膝黃柏丹參龜板調理全安七十七

潘見所老先生有一小盛價年可十六七發熱於午後城中周友以爲陰虛而爲滋陰降火服三十餘劑熱益加且腹中漸脹面色清白仍以六味地黃丸加黃柏知母麥冬五味子之類又三十劑而腹大如斗堅如石飲食大減髮黃成穗額顛光

亮口渴不可言兩腿大肉消盡眼大面肉皆消肌膚枯燥如松樹皮奄奄一骷髏耳予觀其目之神尚五分存欲為治劑潘公門下諸人語予曰形症如是死在日下尚可服藥乎予曰症非死候為用藥者誤耳譬之樹木若根本壞而枝葉枯焦非力可生今焦枯乃斧斤傷其枝葉而根本仍在也設灌漑有方猶可冀生安可遽棄予以神授丹日用一丸煮猪肉四兩飼之十日腹軟其半熱亦消其半神色漸好潘見老詰余曰此何症公能肉枯骨如此之神予曰此疴積症也彼誤認為腎虛而用補陰之藥是以滯益滯腹焉得不大不堅公曰彼純用寒而熱愈熾君用非寒而熱反退此何說焉予曰此熱迺濕熱由脾虛所致補陰之劑皆濕類蓋脾屬土惡濕喜燥今以大蘆會丸肥兒丸調理一月可全瘳矣公曰善徵先生此僕已為泉下物矣七十八

少司空凌繹泉翁年已古稀原有痰火之疾因正月上旬為令孫大婚過勞偶占風寒內熱咳嗽痰中有血血多而痰少痰堅不易出鼻流清水舌生芒刺色焦黃語言強硬不清大小便不利喘急不能睡亦不能仰惟坐高椅椅前安棹棹上安枕日惟額伏枕上而已市醫環治半月不瘳敦予診之兩手脉浮而洪兩關滑大有力知其內有積熱痰火為風邪所闕且為怒氣所加故血上逆議者以高年見紅脉大發熱為懼予曰此有餘症諸公認為陰虛而為滋陰降火故不瘳法當先驅中焦痰火積熱然後以地黃補血等劑收功斯不失先後着也翁以予言為然用瓜蒌石膏各三錢橘紅半夏麩桑白皮前胡杏仁酒荅紫蘇子水煎臨服加入蘿

葡萄汁一小酒盞一劑而血止次日診之脉仍浮而洪大尙惡寒予曰古云傷風必惡風傷寒必惡寒此其常也只因先時失於清散表中之熱未徹竟用滋陰之劑又加童便收斂降下太速以致風寒鬱而不散故熱愈甚也改以定喘湯一劑而喘急減半再劑熱退而不惡寒復爲診之兩手浮體已無惟兩關之脉甚鼓指此中焦痰積膠固已久不可不因其時而疎導之以清中丸同當歸龍會丸共二錢進之其夜大便所下稠粘穢積甚多予憶朱丹溪有云凡哮喘火盛者以白虎湯加黃連枳實有功此法正繹翁對腔劑也與十劑外以清中丸同雙玉丸夜服調理而安七十九

周鳳亭公年五十有八正月腸風下血又飲食過傷大吐而朱友以枸杞地黃膏一斤進之不知此公肝氣素盛中焦原有痰積且多思傷脾又值卯木正旺之月投以地黃枸杞適以滋其濕而益滯其痰耳由是飲食減少肌肉日消腹中痞滯又吳友以歸脾湯進之詎知濕熱未除先用溫補是以油撲火勢成燎原以致大便秘結口乾舌燥據巳午未三時中焦蒸蒸發熱煩悶酉時而退此皆濕熱壅滯於脾無疑矣且面色黃中帶黑下午足面有浮氣皆是濕熱傷脾之徵法宜清肅中焦徹去濕熱則飲食自加而新痰不生宿痰磨去庶五穀精華不生痰而生血矣血充則精神長而肌肉可復且秋來無瘧痢之患公曰清肅中焦當用何劑予曰二陳湯加薏苡仁酒炒白芍藥麥芽以養脾而消痰以枳實黃連洩痞而去熱以青蒿分利陰陽而消其黃葛根升引清陽之氣使肌熱清而口渴可止矣當服十



劑公曰先生之方善但枳實黃連恐體虛者不足以當之予曰惟此二味適可以去公之病根舍是則不效緣中焦有餘之疾非此不能去亦非他藥所能代公半信半疑服四劑而諸疾皆愈公遽中止不復服完至七月盡果發痢疾而以木香檳榔丸下去稠積甚多迺追悔予言而延之診予教以前方仍服十劑夜以丹溪保和丸調理則永無瘡痢之患矣八十

令郎采石先生中焦濕熱生痰否悶五更倒飽且下午兩股或膝下筋脉抽掣疼痛時常嘔氣面色帶黃間常夢遺予以清氣大安化痰丸及猪肚丸二方調治而安猪肚丸用白朮五兩苦參酒炒二兩牡蠣煨過三兩爲末將雄猪肚子一具摘去油甘草湯洗過將藥裝入肚中縫其口飯中蒸極爛爲度搗極勻爲丸此方極健脾去濕熱固精丸也清氣大安化痰丸用白朮四兩橘紅半夏各三兩黃芩黃連俱生薑汁炒各一兩五錢枳實瓜蒌仁各二兩白芥子蘿蔔子各炒一兩姜黃礬水煮乾一兩青黛五錢麥芽取麩打糊爲丸葦葶大每食後及夜茶送下二錢八十一

令孫女纔六歲忽發寒熱一日過後腰脊中命門穴間骨節腫一塊如大饅頭之狀高三四寸自此不能平身而立絕不能下地走動如此者半年人皆以爲龜背痲疾莫能措一法即如幼科治龜背古方治之亦不效予曰此非龜背蓋龜背在上今在下部必初年乳母放在地上坐早之過比時筋骨未堅坐久而背曲因受風邪初不覺其漸入骨節間而生痰涎致令骨節脹滿而大不急治之必成痲疾今

起未久可用萬靈黑虎比天膏貼之外再以晚蚕沙醋洗炒熱絹片包定於膏上帶熨熱之一夜熨一次再以葳靈仙爲君五加皮烏藥紅花防風獨活水煎服之一月而消其半骨節柔軟不復腫硬便能下地行走如初矣人皆以爲神奇此後三個月驚不能行問之足膝瘦軟載身不起故不能行余知其病去而下元虛也用杜仲晚蚕沙五加皮薏以仁當歸人參牛膝獨活蒼耳子仙茅水煎服二十劑行動如故八十一

閱文學蜃樓患虛損咳嗽晝輕夜重乃政丁氏長與富翁女也軀甚肥性甚躁患痛風手不能沐櫛足不能履地凡痛處略腫呻吟喊叫比有朱遠齋氏爲時推重夫婦倚朱治者七越月纖毫不減吳九宜翁迺舉予治至其家蜃樓大兄岳樓日暮與偕診畢語岳樓曰令弟之症雖易見功然非百日不能斷根丁氏症十日便可刈其根但恐不能盡吾劑柰何岳樓曰何謂也予曰令弟咳嗽由肺火未清誤服參朮太過而然但爲清肺利肺咳可立止後以補心安神之劑養之則萬全矣藥用麥門冬桑白皮白藥子貝母桔梗甘草黃芩枳殼十帖咳嗽全止惟心血不足神不固精以酸棗仁遠志麥冬連花心丹參調養百日果能出戶肄業丁症迺濕痰凝滯經絡作痛朱公作血虛而投以地黃芍藥當歸人參牛膝之類宜其痛愈加而病愈久也今必須燥濕流動之劑疎決一番庶經絡通暢雖不服補劑而五穀精華足以自充但疎決之劑不能止痛恐其不余信而中止也岳樓曰先生旣已言明惟命是聽用二陳湯加烏藥葉蒼朮僵蠶海桐皮南星服至五帖果不

三 吳 醫 案 卷 二  
憚而欲止藥岳樓曰孫君已先言十帖見功今過半何不勉強而使功虧一簣哉  
又服一帖而止百般強之不從迺揚言曰請醫療痛而反加痛吾何藥爲後四劑  
斷斷乎不敢奉命矣時已申刻予知其富家嬌態亦不强服隨以芫花醋炒過三  
分海金沙一分爲末白湯調下至晚瀉一次下稠痰半盆足痛減大半稍能動止  
初更後吾輩酒猶未散忽報云腹中大痛促予進看行至後堂內中人出而止曰  
病者卒矣不勞進看予曰此必痛厥非長逝也烏可不進一看至即冷汗淋漓兀  
坐溺器面青息斷執而診之手冷如冰但六脉俱在惟沉伏耳知其爲痛極使然  
用生姜湯灌之而甦徐語近侍女使曰適來腹中痛甚耳後火光濺出肛門如焚  
大响一聲不知瀉下何物衆看之迺血鱗一條長六寸闊半寸餘鱗目俱在盆中  
尙能遊動衆皆悚駭岳樓問曰此鱗下可好否予應之曰此尤物也得下豈不好  
但下症實由痰作予特爲行痰初不知其有虫如是第藥中有芫花迺殺虫之物  
故偶中亦令弟之福也次日手足皆能動仍以二陳湯加苡仁紅花五加皮四帖  
脫然如故閔宅以予不矜功而益重予八十四

金寄閣令堂暑月患痢小腹窘迫胸膈膨脹口舌焦渴右寸關脉洪滑左脉絃迺氣  
鬱食積痢也先與木香檳榔丸開而下之微利一二度因口渴食西瓜一片即惡  
心而吐昨日大便利後胸膈寬快就進飯一碗致腹飽悶兀兀欲吐所吐皆痰涎  
乃以温胆湯加減治之半夏四錢枳實一錢五分竹茹二錢橘紅茯苓各一錢甘  
草五分姜連八分生姜五片水煎服之一飲而胸膈舒暢便能就枕而睡惡心頓

無痢亦尋止八十五

徐中宇之婦汗出如雨昏昏憤憤兩手無所着落胸要人足踰之不少放少放即昏憤益甚氣促不能以息稍近風則嘔惡暈厥與九龍鎮心丹一丸服下即稍定少間則又發始知胸喉中有物作梗而痛湯水難入即藥僅能吞一口多則弗能嚥下乃以蘇合香丸與之暈厥尋止心痛始萌昨日六脉俱伏今早六部俱見惟左寸短濇知其痛爲瘀血也用玄胡索桃仁丹皮丹參青皮當歸香附其夜仍暈厥一次由其痛極而然再與玄胡丹皮桃仁丹參香附青皮烏梅人參貝母桂枝赤芍藥服此痛減大半乃自云心虛有熱頭眩加山梔仁居常多夢交之症近更甚以其心虛故也人參石斛丹參貝母當歸白芍藥酸棗仁酒連香附調理全安八十六

金文學達泉先生令政暑月患痢赤白一日夜三十餘度後重腿急口渴小腹痛孕已二月幸而腰不痛右手脉絃左脉滑與白芍藥三錢黃連黃芩當歸陳皮香附各一錢桂皮木香各五分水煎服外與香連丸服下後重稍輕因進飯太早其夜仍十數度次早診之右絃減半前藥煎成吞女金丹一帖痢減大半六脉已和但軟弱此氣血不足宜從補養用八珍湯加陳皮香附阿膠條芩一帖全安 凡孕婦痢疾後重稍輕腹痛稍減獨痢不止必須補養血氣爲主加調氣之劑爲佐庶可保胎斯亦丹溪虛回而痢自止之意也八十七

金元岩文學下午發熱痢下紅多白少一日夜七十餘度後重下墜飲食不思左脉

細數右脉滑此陰虛之候詢知二日前曾夢遺續得痢疾陰虛明矣但滑脉主食積法當先補後攻乃與小建中湯一帖白芍藥三錢桂枝七分粉草酒連酒苓各八分當歸一錢檳榔五分水煎飲之夜半復診脉稍克指改與枳殼三錢桃仁一錢當歸四錢煎熟吞木香檳榔丸一錢五分至天明大便瀉三次則見冀矣次日午進飯又食火肉隨即大便頻併後重如前與山查枳朮丸一服不效再爲診之六部皆虛軟無力獨右關滑此進肉飯太早脾弱不能消磨宜健脾氣兼爲升舉人參黃耆各二錢白朮一錢升麻三錢防風藿香炮姜粉草各五分白芍藥一錢半茯苓八分連進二帖痢減而後重寬因食狗肉過多復傷脾氣前方加砂仁山查調理全愈八十八

金文學達泉先生因食肝白腸內傷續又冒風就成瘧痢日夜四十餘度小腹痛甚每登廁汗出如雨下迫後重小水澁痛頭疼口渴下午發熱天明始退左脉浮絃而數右軟弱中部稍滑此內傷飲食外感風邪瘧痢併作法當速治否則深秋陽氣潛藏邪因陷下未易瘳也乃先與柴苓湯一劑小便即清不痛瘧發時寒多熱少晚與人參敗毒散加減人參乾葛防風桂枝粉草茯苓枳殼各五分柴胡白芍藥各一錢水煎飲之次日頭痛痢疾俱減夜纔起三次改與補中益氣湯加酒苓桂枝白芍藥其夜瘳止但微熱再改胃風湯人參白朮桂皮各二錢白芍藥四錢當歸一錢五分茯苓川芎各八分酒苓酒連各一錢炮姜二分地榆五分服後寒熱殄迹夜起一次已是真冀前方減去桂枝再三劑而巾櫛出戶矣八十九



金寄間先生七月既望患頭痛口渴汗大洩不歛嘔惡發寒熱間日一發而發於陽日迺爲診之兩寸洪大有力左浮絃而數右脉稍軟亦絃長此少陽與陽明合併爲瘧以柴葛解肌湯主之柴胡葛根各二錢白芍藥石膏各二錢粉草桂枝各五分知母一錢姜二片水煎飲之次早左脉稍退迺與補陰鱉血何首烏丸截之又與黃耆芍藥湯一帖以防作痢白芍藥石膏黃耆各三錢桂枝五分知母粉草各一錢柴胡七分姜三片煎服後加人參七分瘧竟全止而向安矣九十

淮陰胡少泉翁麗水縣三尹也令郎年弱冠患夢遺百治不應體倦而氣弱食少而汗多四肢痿軟頭眩肌熱將成瘵疾知余在埋刑吳比部衙中敦余爲治其脉兩寸短左寸尤甚餘部滑數余曰郎君之脉心氣大弱蓋心者神之舍神者精之主神旺始能固精今遺不禁由神弱不能固攝其精致多妄洩時近端陽諸症叢集迺兼注夏病也法當養心安神庶不成瘵翁曰然前此諸公每爲滋陰降火多不見功徒見損脾減食今先生主以養神願以先生是聽迺與人參黃耆石蓮子酸棗仁蓮花心石菖蒲遠志當歸補心安神爲君俾精固汗斂經曰汗者心之液汗多則心血愈虛故佐以甘草白朮黃精麥門冬五味子兼治注夏使飲食加而四肢壯緩而圖之可萬全矣藥進甚妥竟以此方調理果精固神全肌熱盡退又令愛及笄頭痛微熱經水愆期日多咳嗽食漸減肌漸消口渴睡臥不寧喉中血腥四肢不勞而疲體不動而汗六脉絃而且數左關長出寸口余以逍遙散加石斛丹參牡丹皮酸棗仁山梔子麥門冬調理而瘳又一文學貧士也忘其姓氏與胡

三 吳 醫 案 卷 一  
少泉翁爲碩交有奇疾兩足不痿不痛每行動絕不聽其所用或扭於左而又墜於右或扭於右而又墜於左之立而行不能一步步正走此亦目之稀覯竟不識爲何疾書無所考予臆度之由筋軟不能束骨所致故行動則偏斜扭墜也夫筋者肝之所主肝屬木木縱不收宜益金以制之用人參黃耆白芍藥以補肺金意以仁虎骨龜板杜仲以壯筋骨以鐵華粉專制肝木煉蜜爲丸早晚服之別後三載族姪理問公敬亭南還道出淮陰胡少泉寄語云向者鐵粉所愈之疾淮人極以爲奇遠邇敦錄其方布傳以頌自恨貧儒弗能致一芹爲謝且暮額手南斗以識不忘云九十一

一 吳氏嬪有隱疾其夫訪於予三造門而三不言忸怩而去後又至未言而面先赭予因詰之曰諸來詣予者皆謂余能爲人決疑療急也今子來者四必有疑於中疑而不露一語雖百來而疑終不可決疾終不可去矣且盈天地間怪事甚多非聖智所能盡識然亦非聖智不能通療也彼折肱錄醫鑑醫說等集怪症蝟毛假非明哲決而治之何以擴後人之聞見也其夫乃俛首徐應曰言之無任主臣先生長者即言之諒無哂山婦子戶中突生一物初長可三寸今則五寸許矣狀如堅筋色赤大可拱把脹而且痛不便起止憎寒壯熱寢食俱減羞澁于言每求自盡聞先生能爲人決疑療怪不啻扁華特相訪而祈一決予曰疾成幾年對曰將百日予曰蓋凡所謂怪者耳目無所聞覩書籍無所註載今所言者迺陰挺症也書有所徵奚足言怪夫曰陰挺何自而生何法而治幾何月日而可愈也可無妨

千生育否予曰子戶屬厥陰肝經肝屬木肝有濕熱故生陰挺猶木有濕熱而生  
蠶然法當以龍胆瀉肝湯反蝟皮散當歸黃芩牡蠣蝟皮赤芍藥爲末每用二錢  
空心米飲調下即而治之大計月餘可消釋也奚生育之有妨哉其夫合手頂禮  
於地曰願如藥王言敢徵一料隨按法措劑畀之而去甫三月來報云前疾果如  
所言消釋無痕茲爲汛期一月不至敢問予曰此有身也夫曰疾纔愈未必即能  
受身恐防他疾予曰前恙迺肝經有餘之疾肝爲血海書云女人血盛則懷胎據  
血盛行當先期今汛踰期實孕耳匪病也後果足月而產一子九十二

前坵一染匠之婦腹痛兩月矣或以爲寒爲熱爲氣爲虛爲食積爲虫遞嘗試之轉  
加一醫與膏藥如斗大者一個滿腹貼之痛益劇迺揭去膏藥即粘牢不可起火  
熨油調百計不能脫分寸如生在肉上相類無可奈何知予在吳鄉宦宅中迺買  
舟就予診及抵吳門轎口匠偕迺母迺姑四人儘力扶挽絕不能動移一步岸上  
環視如堵莫不語匠曰病勢若此時刻難抵固迺強其起而欲污吾轎口耶匠迺  
止婦舟中起而懇予爲治至舟中見其面色蒼黑及伸手求診皮膚燥若老松樹  
皮之狀六脉皆洪數問其腹中之痛何在匠即爲解衣露腹指其痛所始知膏藥  
粘牢之故此甚希覲叩其不能舉步之由婦曰非力弱不能行迺左腳不可動動  
即痛應於心是以一步不能舉也予俛思若色若脉皆非死候胡治而益劇也此  
必腸癰左腳莫能舉是其徵也與營衛返鬼湯加金銀花爲君與四帖酒水各一  
碗煎服一帖痛稍減二帖下臭膿半桶痛全減腹上膏藥不須手揭自脫而下由

熱去而膏脫也四帖完其婦同匠詣吳宅拜謝予并求善後之方吳宅見之一族皆驚九十三

王祖泉大便裏急後重腹痛日夜下紫黑稠粘三四十度市中凡有名者雷同痢治自秋歷冬三越月不瘳形色瘦瘁匙筋厭舉即勉強僅一盞而止眼闔懶開悉以爲不治棄去訪予脉之六部濡弱觀其所下之色甚晦如芋苗汁之狀予曰觀此色非痢迺臟毒下血症醫說中人參樗皮散正此對腔劑也即製與之其夜果減半終劑全愈方以人參樗根白皮各二兩爲末每空心米飲調服二錢忌肉汁生菜魚腥九十四

癸巳秋仲南都大司馬裏洪溪老先生以兼署工部都察院操江印日衝暑往來各衙門而經略其政事致發熱燥渴因解燥渴而過食水浸瓜梨新藕遂成洩瀉小水短少醫以胃苓湯加滑石木通車前子利之而瀉止大便又因之結燥艱澁不堪迺用潤腸丸復瀉不止又進以前通利之劑瀉雖止而小水竟不得流通直遂臍下脹急立起解之則點滴不出臥則流之不竭以頻取夜壺致通宵不得寐也治半月餘而精神削寢食廢聞予寓崔勳部衙而徵予治初見即告以受病之源又謂都城諸醫俱不識爲何症將認爲癰則立解時點滴不出認爲秘臥則涓涓而流謂爲脾約大便又不結燥謂氣虛下陷心血不足而補中益氣湯與安神丸服過十晝夜無益雅聞先生高手願一診以決之探其脉兩寸短弱關緩大兩尺洪大語之曰此餘暑未解而司馬素善飲濕熱流於下部也今已下午恐診之未

淮侯明早細察而再定方公曰延頸吾子久矣適所言近似願亟求一劑飲之徹夜間一睡余不得已以益元散三錢煎香薷湯之略無進退次早復診六脉如昨予思之而恍然悟又語之曰此症尿竅不對也司馬曰名出何書予曰內經云膀胱者脬之室也脬中濕熱下墜故立解而竅不對小水因不得出臥則脬不下墜而尿滲出膀胱亦以竅不對小水雖涓涓而流亦不能通達直遂故了而不了也治惟提補上中二焦元氣兼清下焦濕熱斯得矣又有一法今氣虛下陷已久一兩劑未能取效安得伏枕而睡且此不寐非心血不足之故因着心防閑小便之了而不了而不敢寐也暫將舊衣或布襯於席上不必防而任其流出又免取夜器而勞動其神自然熟睡矣以補中益氣湯提補上中二焦之元氣加黃栢知母祛下焦之濕熱夫清陽升則濁陰自降脬無濕熱則不下墜竅可對而病可瘳矣司馬忻然請藥夜如法襯之果曙然一睡相忘其尿之出不出也次早視襯布雖濕而不甚以久不闔目得此一睡神氣頓回胸臆爽快如未病者調理四日而病全安司馬大喜而欲留久住緣漕運李公相延之亟弗克也差大馬鼙鼓吹送予阡崗而還九十五

崔百原公者河南人也年餘四十矣而爲南動部郎患右脇痛右手足筋骨俱痛艱於舉動者三月諸醫作偏風治之不效馳書邑大夫祝公徵予治予至視其色蒼其神固性多躁急脰其脉左絃數右滑數時當仲秋予曰此濕痰風熱爲痺也脉之滑爲痰絃爲風數爲熱蓋濕生痰痰生熱熱壅經絡傷其營衛變爲風也公曰



君何以治予曰痰在經絡雖不害事然非假歲月不能愈也隨與二陳湯加鈎藤  
蒼耳子薏以仁紅花五加皮秦朮葳靈仙黃芩竹瀝姜汁飲之數日手足之痛稍  
減而脇痛如舊再加鬱金川芎白芥子痛俱稍安予以赴漕運李公召而行速勸  
公請假緩治因囑其愼怒內觀以需藥力公曰內觀何爲主予曰正心公曰儒以  
正心爲修身先務每苦工夫無下手處予曰正之爲義一止而已止於一則靜定  
而妄念不生宋儒所謂主靜又曰看喜怒哀樂未發以前作何氣象釋氏之止觀  
老子之了得一萬事畢皆此義也孟子所謂有事勿正勿忘勿助長是其工夫節  
度也公曰吾知止矣遂上疏請告予錄前方畀之北歸如法調養半年而病根盡  
除九十六